

## **Kalata gwa Pauli ku Balooma Isyakulongosya**

Untumigwa Pauli aasimbile kalata ujū ku biitiki abaa nkaaja akaa mu Looma ikyinja kya 56 bo apaapiigwe Jesu, paapo aalondaga ukubalingaania indumi iji aalumbiliile mfiisu ifingi. Ikubalingaania ukuti indumi inunu ijaa Jesu jikunangisya muno Kyala ikubabala ubugolofu abandū abaa mfiisu fyosa ku lwitiko. Ku Bajuuata abiiitiki, ikubalingaania ukuti indumi iji jilimo moope na ndwitikano ulukulu. Kuli aba bakaja Bajuuata ikubanangisya ukuti indumi ijo jikubafwania na Kyala nu kuja bandū baake. Ikulingaania ukuti ku lwitiko Kyala atubalile ubugolofu nkyeni mmyake. Po leelo Kyala atikutubala ubugolofu ku njila jaa kusikonga indagilo syake. Looli linga tukunndekela Mbepo Mwikemo ukutulongosya mbuumi bwitu, po aatukutugalaga bo muno Kyala ikulondela.

Kummaliikisyo mwa kalata ujū (ulutulo ulwa 12-15), Pauli ikulingisania akajilo akaa biitiki muno bikulondeligwa ukujā nako mbuumi bwabo. Ikumanyisya isya kubagana abandū abangi. Amaliikiisye (ulutulo ulwa 16) ukubaponia abamanyaani baake abaa mu Looma, ikumponia jumoojumo ku ngamu jaake.

**Isi silimo mwa kalata ujū**

Ɔnongwa isya nsimbi na aba ikubasimbila kalata ujū

Kyala ikubabala ubugolofu abandū kū njila jeene ijaa lwitiki

Imanyisyo isya būmi ubūpya ubwa Bakilisiti

Kyala aabasungwile aBajuuta, aikubapoka

Akajiilo akaa Bakilisiti, ni mbombo jaa Pauli

Ɔlūponio kū biitiki abangi abaa nkipanga kya Kyala

*Ɔlūponio*

<sup>1</sup> Kalata ujū afumile kumyangū une Pauli, ne mbombeli gwa Kilisiti Jesu. Aalimbilikiile ukūja ntumigwa nū kuusungula ukūti mfumusyeye iNdūmi iNunu ijaa Kyala.

<sup>2</sup> ƆNdūmi iNunu ijo, jo iji Kyala aafingile ukufuma liijolo, kū njila jaa bakunguluka baake, bo muno sisimbiigwe mwa Kalata uMwikemo.

<sup>3</sup> ƆNdūmi ijo ijaa Mwanaake,\* ujū mbundu bwake aali gwa nkikolo ikya malafyale Ndaabiti.†

<sup>4</sup> Ɔjo jo ujū Kyala aalinsyūsiisye kū maka agaa Mbepo Mwikemo gwake. Kū njila ijo, ansetwile ukūja Mwanaake, uMwene maka goosa. Ɔjo jo Ntwa gwitū Jesu Kilisiti.

<sup>5</sup> Ɔkwendela kumyake, Kyala aalimbeele iipyana ilya kūja ntumigwa, ukubūka nkufumusya iNdūmi iNunu kū bandū baa mfikolo fyosa, ukūti bammwitike Kilisiti nū kummwimika, ingamu jaake jituufigwege.

\* **1:3 1:3 ƆMwanaake** Bala iisya **ƆMwana gwa Kyala** kū Ɔsyakulingaania. † **1:3 1:3 Ndaabiti** Bala kū Ɔsyakulingaania.

<sup>6</sup> Umwe nuumwe muli nkibugutila ikyo ikya bandu aba Jesu Kilisiti ababilikiile ukujja bandu baake.

<sup>7</sup> Mbasimbiile umwe mwesa mwe bandu baa mu Looma mwe Kyala abaganile fiijo, nu kubabilikila ukuti muje biikemo.‡ Hiiipyana nu lutengaano ukufuma kwa Taata Kyala na ku Ntwa Jesu Kilisiti, fijege na nuumwe.

*Umbaatiko lwa Pauli ukubuka ku biitiki abaa mu Looma*

<sup>8</sup> Akaa kwanda, ukwendela mwa Jesu Kilisiti, ngugwa ulupi kwa Kyala gwangu kunongwa jinu umwe mwesa, paapo ulwitiko lwinu lufumwike pakiisu poosa.

<sup>9</sup> Kyala nkeeti gwangu, uju ngumbombela ni ndumbula jangu joosa, ku njila ijaa kufumusya iNdumi iNunu ijaa Mwanaake. Ameenye muno ngubasumila umwe akabalilo koosa.

<sup>10</sup> Ngansuma Kyala bwila, ukuti linga iiganile, mbagiile ukwisa kumyinu.

<sup>11</sup> Nsyakilwe fiijo ukubabona, ukuti mbajabile ulusajo ulu lukufuma kwa Mbepo Mwikemo, ukuti mukake ndwitiko lwinu.

<sup>12</sup> Kokuti, ulwitiko lwinu lungasye une, ulwitiko ulwangu lubakasye umwe.

<sup>13</sup> Baamyitu ndwitiko, ngulonda mumanye ukuti, naalondaga kaa kingi ukwisa kumyinu. Leelo mbingiigwe ukwisa kumyinu mpaka ulu. Ngulonda niise uko koope mfumusyeye iNdumi iNunu, bo ulu mbombile mfiisu fimo, ukuti abandu bammwitike uNtwa Jesu.

‡ **1:7 1:7 Abiikemo** Bala ku Isyakulingaania.

14 Keeta, ngumeleligwa na Kyala, ukufumusya iNdumi iNunu ku bandu boosa, ku Bagiliki na ku bandu aba bakaja Bagiliki, § ku bamanyili na kuli aba bakaja bamanyili.

15 Fyobeene ngunyonywa fiijo ukwisa kukufumusya iNdumi iNunu kumyinu, mwe bandu baa mu Looma.

### *Amaka agaa Ndumi iNunu*

16 Ndikufwa isoni na panandi ukufumusya iNdumi iNunu ijo, paapo go maka agaa Kyala agaa kubapoka abandu boosa aba bikummwitika Jesu, ukwandila ku Bajuuta mpaka ku bandu aba bakaja Bajuuta.

17 INdumi iNunu ijo jisetwile muno Kyala ikubabala ubugolofu abandu, ku njila jaa lwitiko lwene, bo muno sisimbiigwe mwa Kalata uMwikemo ukuti, “Umundu ugolofu ikutuugalaga ku njila jaa lwitiko lwake.”\*

### *Kyala ikubafunda abandu kunongwa jaa butulanongwa bwabo*

18 Ingalalisi sya Kyala sisetuliigwe ku bandu boosa ukufuma kumwanya. Ikwisa kubafunda abandu aba ku njila jaa buibi bwabo, bikubupinga ubwanalooli ukuti bulingamanyigwa, paapo bikunkaana Kyala nu kubomba fiijo imbiibi.

---

§ 1:14 1:14 Ku Bagiliki na ku bandu aba bakaja Bagiliki Akabalilo aka aasimbiigwe kalata uju, injobelo ijaa Kigiliki ni nyiiho sya Bagiliki syabombigwaga mfiisu fingi. Abandu aba bakaja Bagiliki bo aba bakajimanya injobelo iji, bakaakongaga inyiho isya Bagiliki. Aba bakiimikigwaga. \* 1:17 1:17 Bala kalata gwa Habakuki 2:4.

19 Kūkaja kokuti bakasimanya nasimo isya Kyala, namanga isi syali sya kusimanya, sili pabwelu, paapo Kyala jũũjo asisetwile kũ bandũ boosa.

20 Ũkwandila akabalilo aka Kyala aapelile ikiisu, abandũ babagiile ukũmmanya Kyala muno ajũiliile. Na paapo batikũmmbona, bameenye ukuti ali na maka agaa bwila na bwila, nũ kuti mwene jo Kyala, akajako ujungi. Abandũ babagiile ukũmmanya kũ njila jaa ifi afipelile, fyobeene abandũ bakaja ni fya kwinokeysya ukuti bakammanya.

21 Na paapo bammeenye Kyala, poope batikũntuufya pamo ukũngwila ulupi bo muno bikũlondeligwa. Looli bali ni nyiinogono isya mwalo, ni ndumbula syabo sya bukonyofu butũũũ.

22 Abeene bikwijumbika ukuti bali na mahala, ngimba bakonyofu.

23 Balekile ukũmmwipuuta Kyala ujũ atikufwa, bikwipuuta kũ fifwani ifi fifwene na bandũ, ni fya finyamaana ifya lũko nũ lũko, ifi fyosa fikufwa.

24 Kũnongwa ijo, Kyala abalekile ukuti babombege isi bikũlonda, ukũkonga ifinyonyo fyabo ifinyali nũ kũbombanila ingosya soni ni mibili gyabo.

25 Balekile ukũbwitika ubwanalooli ubwa Kyala, bikũkonga imanyisyo isya butungulu. Bikũfibombela nũ kũfiipuuta ifipeligwa, looli balekile ukũmmwipuuta uMpelu, ujũ abagiisye ukũtuufigwa bwila na bwila! Amen.

26 Kũnongwa ijo, Kyala abalekile, ukuti balon-

gosigwege ni finyonyo fyabo ifikosya soni. Boope na bakiikula balekile ukubombela imibili gyabo na banyambala, looli bikubombelana baabo kwa baabo.

27 Bubuabo na banyambala boope, balekile ukubombela imibili gyabo ku bakiikula, bikunyonywana baabo kwa baabo. Abanyambala bikubombelana ingosya soni. Ku njila ijo biisaliile muno bikwisa kufundigwaga ku mbombo syabo imbiibi.

28 Ukongelapo pali isyo, bo ulu abandū abo bakaanile imanyisyo sya Kyala, joope Kyala abalekile ukuti baje na mahala aga gabolile loosa, babombege imbombo isi sikabagisya ukubombigwa.

29 Biiswile ububiibi ubwa luko nu luko, ubunyali, ubuufi na kabini. Biiganile ukugoga, ukumana, ukutungulupa, ukusofania abandū, nu kuheeha.

30 Kangi boohesi, bikunkalasya Kyala, batikupaasya abiinaabo, kangi bali na matingo nu kwijumbika. Akabalilo koosa bikulonda injila imbya ijaa kubomba ubutulanongwa, batikubiimika abapaapi baabo.

31 Kangi bakaja na mahala, bakaja baa kusubiligwa, bakaja nu lugano, bakaja ni kisa.

32 Na paapo abandū abo bameenye fijo ukuti, Kyala ikwisa kubalanga ukufwa abandū aba bikubomba imbiibi isyo, poope batikupaasya! Bikwendelela ukubomba imbiibi kisita kutiila nafimo, kangi bikubatuufya abandū aba bikubomba imbiibi sisiisyo.

## 2

### *Ƴbɔlongi bwa Kyala bwa bɔgolofu*

<sup>1</sup> Po mwinangu ɔgwe, gwe kɔbalonga abanino, ɔkaja nasyo isya kwinokesya, nalinga gwe gwani. Paapo linga kɔndonga ɔnniino, po kwilonga jɔjɔgwe, paapo nungwe ɔbombile imbiibi sisiisyo.

<sup>2</sup> Tameenye ɔkɔti ɔbɔlongi bwa Kyala bwa bwanalooli, kɔ bandɔ aba bikɔbomba imbombo imbiibi bo isyo.

<sup>3</sup> Po gwe mwinangu, linga kɔndonga ɔnnino looli nungwe kɔbomba imbiibi sisiisyo, ɔlingiinogonaga ɔkɔti Kyala aikɔkɔleka kisita kɔkulonga.

<sup>4</sup> Kyala nnunu, kangi ikɔkɔpaakisya fiijo nɔ kɔkɔkeetelela. Keeta kɔmmwilaamwa? Bɔle, ɔkamanya ɔkɔti ɔbɔnnunu bwa Kyala bukɔkɔpela ɔkɔti ɔpindɔke?

<sup>5</sup> Looli paapo ɔli na matingo, kangi kɔkaana ɔkɔpindɔka, kwilɔndikila ɔlɔfundo ɔlɔnywamu, pakabalilo aka Kyala ikwisa kɔsetɔla ingalalisi syake nɔ bɔlongi ɔbwa bɔgolofu.

<sup>6</sup> Iisikɔ ilyo, “Kyala ikwisa kɔnhomba kɔkɔti mundɔ ɔkɔkongana ni mbombo syake.”\*

<sup>7</sup> Ikwisa kɔbapa ɔbɔɔmi bwa bwila na bwila, aba bikwijɔɔla ɔkɔbomba inunu, paapo bikɔlonda ɔbɔsisya, ɔlwimiko nɔ bɔɔmi ɔbo ɔkɔfuma kwa Kyala.

---

\* **2:6 2:6** Bala kalata gwa Ƴsabɔli 62:12.

8 Looli abaa kabini na aba bikubukaana ubwanalooli, nu kukonga imbiibi, Kyala ikwisa kubakalalila nu kubafunda fiijo.

9 Kukuti mundu uju ikubomba imbiibi ikwisa kutaamigwa nu kukaba ingubilo, ukwandila ku Bajuuta, mpaka ku bandu aba bakaja Bajuuta.

10 Looli boosa aba bikubomba inunu, Kyala ikwisa kubapa ubusisya, ulwimiko nu lutengaano, ukwandila ku Bajuuta, mpaka ku bandu aba bakaja Bajuuta.

11 Namanga Kyala ikubombela ikipimilo kilakila ku bandu boosa.

12 Abandu aba bakasimanya indagilo sya Moose, linga bikubomba imbiibi, bikwisa kupyutigwa kisita ndagilo isyo. Looli aba basimeenye indagilo sya Moose, kokuti aBajuuta, linga bikubomba imbiibi, bikwisa kulongigwa ukukongana ni ndagilo isyo.

13 Aba Kyala ikwisa kubabala ubugolofu, bo aba bikubomba isi indagilo sya Moose sikulagila, somma aba bikupilika indagilo isyo kisita kubomba.

14 Namanga abandu aba bakaja Bajuuta bakaja ni ndagilo isyo. Looli linga bikubomba inunu ukukongana ni nyiiho syabo, inunu isyo linga sifwene na isi sikulagila indagilo, bikunangisya ukuti basimeenye kilingaani indagilo isyo, nalinga bakaja nasyo.

15 Imbombo syabo sikunangisya ukuti indagilo isyo sisimbiigwe mu ndumbula syabo. Indumbula syabo bukeeti, kangi inyiinogono syabo lamo sikubasitaaka, lamo sikubanosya.

16 Sikwisa kaja bo ulo pi isiku lya balongi.



Kyala ikwisa kubalanga abandũ mu nyiinogono syabo isya mbũtiitũ ukwendela kwa Kilisiti Jesu. INdũmi iNunu iyi ngũjifumusya bo jili.

### *Abajuuta ni ndagilo sya Moose*

<sup>17</sup> Po ugwe gwe kuti ũli Njuuta, kusũubila indagilo, kangi kwituufya ukuti ummeenye Kyala,

<sup>18</sup> ugwe umanyisiigwe indagilo, ugwe ubũmeenye ubwigane bwa Kyala, nũ kusyagania inunu.

<sup>19</sup> Ugwe kwibona ukuti ubagiisye ukubalongsya abafwa maaso bala, aba bakasimanya isyo, nũ kũja nyaale jaa kubamulikila abandũ mu ngiisi.

<sup>20</sup> Ugwe gwe mmanyisi gwa aba bakaja na mahala, ũli mmanyisi gwa baana abafyele, kwibona ukuti indagilo sikũpeelee ukũmanya nũ bwanalooli.

<sup>21</sup> Ugwe kubamanyisya abangi, fiki utikwimanyisya? Kubamanyisya abangi ukuti balingiibaga, keeta ugwe kwiba?

<sup>22</sup> Ugwe kubabũula abandũ, kuti, "Mulingalogwaga," keeta ugwe kũlogwa? Kangi ubagiile bũleebũle ukubakalalila aba bikwipuuta kũ fifwani, bo jujuugwe kwikabisya nkũhiija utũndũ utwa nnyumba isya kwipuutilamo kũ fifwani?

<sup>23</sup> Ugwe kwituufya ukuti usimeenye indagilo sya Kyala, keeta ugwe kũnsũsya Kyala kũ njila jaa kũkilania indagilo syake?

24 Bo muno sisimbiigwe mwa Kalata umwikemo ukuti, “Kunongwa jaa kajiilo kiinu, ingamu jaa Kyala jikutukigwa na bapanja.”†

25 ABajuuta boosa abanyambala bikubuitigwa kukiye.‡ Uko kuli ni fya kukabamo kumyako, linga kusikonga indagilo. Looli linga umundu akileenie indagilo, ukubuitigwa kwake kukaja ni fya kukabamo. Ujo afwene nu mundu uju akabuitigwa kukiye.

26 Po umundu uju akabuitigwa kukiye, linga ikusikonga indagilo, Kyala ikummwitika bo ulwa mundu uju abuitigwe kukiye.

27 Kangi umundu uju akabuitigwa kukiye, linga akongile muno sikujobela indagilo, imbombo syake inunu sikunangisya ukuti umwe mwe Bajuuta muli batulanongwa. Namanga mubuitigwe kukiye, ni ndagilo muli nasyo, looli mutikusikonga.

28 UNjuuta gwa nalooli ali buleebule? Akaja jo uju abuitigwe kukiye! Ukubuitigwa kukiye fyo fiki? Kutikubombigwa mu mbili!

29 UNjuuta gwa nalooli, jo uju ikuntiila Kyala mu ndumbula jaake. Koope ukubuitigwa kukiye ukwa nalooli, ko kuno kukatendekesigwa mu ndumbula. Uko kukubombigwa na Mbepo Mwikemo, komma na masyu agaa ndagilo. Umundu uju abuitigwe mu ndumbula ikukaba ulwimiko ukufuma kwa Kyala, atikusubila ulwimiko ukufuma ku

† 2:24 2:24 Bala kalata gwa Jeesa 52:5; Eseyeli 36:20-22.

‡ 2:25 2:25 **Ukubuitigwa kukiye** Bala ku isyakulingaania.

bandu. §

### 3

#### *Ubugolofu bwa Kyala*

<sup>1</sup> Pamo kuundaalusya ukuti, “Kukabamo ifiki ukujja Njuuta? Bule, ukubuutigwa kukiye ni kuli ni fya kukabamo?”

<sup>2</sup> Nalooli ukujja Njuuta kukabamo ku njila nyingi. Akaa kwanda, Kyala aabapeele aBajuuta amasyu gaake.

<sup>3</sup> Looli sya nalooli aBajuuta bamo bakaali bagolofu. Bule, kokuti ubugolofu bwa Kyala busobile?

<sup>4</sup> Himma na panandi! Nalinga abandũ boosa batungulu, Kyala ngolofu. Bo muno sisimbiigwe mwa Kalata uMwikemo ukuti, “Mmasyu gaako kubonekaga ukujja ngolofu, Linga bikukulonga, kutolaga.”\*

<sup>5</sup> Bamo bikujoba bikuti, “Imbiibi syitu nunu paapo sikunangisya ukuti Kyala ngolofu.” Bule, tukutigi akaja ngolofu bo ikutufunda?

<sup>6</sup> Himma na panandi! Paapo linga sili bo ulo, po Kyala ikwisa kubalanga buleebule abandũ abaa pakiisu apa ku bugolofu?

<sup>7</sup> Kangi bamo babagiile ukulaalusya ukuti, “Linga ubusyobi bwitu bukutũula ukunangisya ubwanalooli ubwa Kyala nu kongelapo ubusisya bwake, fiki uswe tukulongigwa ukujja batulanongwa?”

---

§ 2:29 2:29 Bala kalata gwa Ukukumbuka Ingomeelesyo 30:6.

\* 3:4 3:4 Bala kalata gwa Isabuli 51:4.

8 Ʋko kufwene nũ kuti, “Tubombege imbiibi ukuti siise inunu!” Abandũ bamo bikuti, nuuswe tukumanyisya bo ulo. Po abandũ abo bikwisa kufundigwa ukukongana ni mbiibi syabo.

*Akajako umundu ungolofu*

9 Po leelo tuti fiki? Bũle, uswe twe Bajuuta tũli banunu ukubakinda aba bakaja Bajuuta? Himma na panandi! Namanga mbabũlile kilingaani ukuti aBajuuta na aba bakaja Bajuuta bafwene itolo, boosa bikulongosigwa nũ butulanongwa.

10 Bo muno sisimbiigwe mwa Kalata umWikemo ukuti,  
“Akajako umundu najũmo ungolofu.

11 Akajako umundu najũmo ujũ asimeenye isya Kyala,  
akajako ujũ ikulonda ukusimanya.

12 Abandũ boosa balekile ukuntiila Kyala,  
nkyeni mmyake bakabagisya kangi.  
Akajako umundu najũmo ujũ ikubomba inunu.”†

13 “Imilomo gyabo gili bo ulwa mapũmba aga gali bwasi,  
indimi syabo sikujoba ubutungulu.”‡

“Mmilomo gyabo sikusooka inongwa isya kugoga,  
bo ulwa kulumigwa ni njoka.”§

14 “Ubujobi bwabo,  
bwiswile inongwa isya kuguna nũ kufulasya.”\*

† 3:12 3:10-12 Bala kalata gwa Isabũli 14:1-3; 53:1-3. ‡ 3:13

3:13 Bala kalata gwa Isabũli 5:9. § 3:13 3:13 Bala kalata gwa

Isabũli 140:3. \* 3:14 3:14 Bala kalata gwa Isabũli 10:7.

15 “Amalundi gaabo mapepe ukubuka kukugoga.

16 Poosa apa bikuja,  
bikufulasya nu kubapelela abandu ingubilo.

17 Bakajimanya injila ijaa kutugala ku  
lutengaano.”†

18 “Batikuntiila Kyala siku.”‡

19 Looli tumeenye ukuti inongwa isi sikufuma mwa Kalata uMwikemo, sisimbiigwe kuli aba baapeeliigwe kalata ujo. § Isyo syasimbiigwe ukuti Kyala bo ikukilonga ikiisu, abandu boosa balingiisa kujaga ni sya kwinokeysya, kangsi siboneke pabwelu ukuti boosa batulanongwa nkyeni mwa Kyala.

20 Po leelo, akajako umundu uju ikubaligwa ubugolofu nkyeni mwa Kyala ku njila jaa kusikonga indagilo sya Moose. Imbombo jaa ndagilo ko kubanangisya abandu boosa ukuti batulanongwa.

*Umundu ikubaligwa ubugolofu ku njila jaa kummwitika Jesu*

21 Looli akabalilo aka Kyala ajisetwile injila ijaa kubabala abandu ubugolofu nkyeni mmyake, kisita kwendela mu ndagilo sya Moose. Inongwa isyo, indagilo sya Moose na masimbo agaa bakunguluka gaasisimikiisye.

---

† **3:17 3:15-17** Bala kalata gwa Jeeseja 59:7-8. ‡ **3:18 3:18** Bala kalata gwa Isabuli 36:1. § **3:19 3:19** Aba baapeeliigwe kalata ujo bo Bajuuta. Aba bo aba Kyala aabapeele Kalata uMwikemo.

<sup>22</sup> Ubugolofu bwa Kyala bwisile ku bandu boosa aba bikummwitika Jesu Kilisiti. Kyala atikwegamila ku mundu,

<sup>23</sup> namanga uswe twesa tutulile inongwa, nu kwagilwa ubusisya bwa Kyala.

<sup>24</sup> Looli Kyala kwi ipyana lyake, atubalile ubugolofu kisita uswe ukuhomba fimo, ku njila jaa bupoki ubu Kilisiti Jesu atatwaliile.

<sup>25</sup> Kyala aalinsoosiisye Kilisiti ukujja ikemo ilya kubooligwa, ukutufwania uswe nu mwene. Kilisiti aalyonile iilopa lyake ku nongwa jaa bandu aba bikummwitika. Kyala aabombile bo ulo, ukunangisya ukuti, umwene ngolofu, kangi ukuti aali ngolofu nalinga akaabafundile abandu ku butulanongwa ubu baabombile akabalilo akaa kunyuma.

<sup>26</sup> Kuli isyo, anangiisye ubugolofu bwake nkabalilo aka. Umwene jo ngolofu, kangi jo uju ikubabala ubugolofu aba bikummwitika Jesu.

<sup>27</sup> Po bule, tubagiile ukwituufya? Himma! Bule, tubagiile ukwituukifya ukukonga indagilo sya Moose? Himma! Paapo tukupokigwa kwene ku lwitiko lwitu.

<sup>28</sup> Tumeenye ukuti Kyala ikutubala ubugolofu ku njila jaa kummwitika Jesu, somma ku njila jaa kukonga indagilo.

<sup>29</sup> Linga kwali ko ku njila jaa ndagilo, Kyala ngali jo Kyala gwa beene aBajuuta. Bule, umwene akaja jo Kyala gwa bandu abangi boope? Nalooli umwene jo Kyala gwa bandu boosa,

<sup>30</sup> paapo aliko Kyala jumojwene, uju ikubabala ubugolofu aBajuuta, aba babuutiigwe kukyeni,

na aba bakaja Bajuuta, aba batikũbuutigwa kũkyeni. Boosa bikũbaligwa ũbugolofu kũ njila jaa kũmmwitika mwene Jesu.

<sup>31</sup> Po ũlu tukũsisimikisya ũlwitiko, bule, kokuti indagilo sikaja na mbombo najimo? Himma na panandi! Looli ndwitiko indagilo sifikile pa nyango jaake.

## 4

### *Aba bikũmmwitika Jesu ũgwisabo jo Abulahamu*

<sup>1</sup> Bule, tũti fiki kũ sya mwisukũlu gwitũ Abulahamu,\* muno aasimanyiile isya kũbaligwa ũbugolofu?

<sup>2</sup> Linga tukuti Abulahamu aabaliigwe ũbugolofu ũkũkongana ni mbombo syake, ngali ali ni sya kwituukifya, leelo akaali nasyo nasimo nkyeni mwa Kyala.

<sup>3</sup> Kalata ũMwikemo ikuti fiki? Ikuti, “Abulahamu aalimmwitiike Kyala, po Kyala alinkũmbala ũbugolofu.”†

<sup>4</sup> Nalooli, ũmundũ linga abombile imbombo, ikũpeeligwa ũmfwalo ũkũfwana ni mbombo. Atikũhombigwa kisita kũbomba.

<sup>5</sup> Kyala atikũmbala ũbugolofu ũmundũ ũjũ ikũsũũbila imbombo syake, looli ikũmbala ũbugolofu ũntũlanongwa ũjũ ikũmmwitika.

<sup>6</sup> Ũmalafyale Ndaabiti joope, aajobile inongwa isya sajo sya mundũ ũjũ Kyala ikũmbala ũbugolofu, kisita kũkeeta imbombo syake, aatile,

---

\* **4:1 4:1 Abulahamu** Bala kũ Isyakulingaania. † **4:3 4:3** Bala kalata gwa Ũbwandilo 15:6.

7 “Basajiigwe aba Kyala abahobokiile imbiibi syabo,

nu kubusoosyapo ubutulanongwa bwabo.

8 Asajiigwe umundu ujū uNtwa Kyala atikummbala ukūja ntulanongwa.”‡

9 Bule, isajo isyo, sya beene aba babuutiigwe kūkyeni? Kokuti beene aBajuuta! Bule, sikaja sya bandu abangi boope? Kokuti aba bakaja Bajuuta! Mukumbake isi Kalata uMwikemo ikuti, “Abulahamu aalimmwitiike Kyala, po Kyala alinkummbala ubugolofu.”§

10 Isi syabombiigwe buleebule? Bule, syabombiigwe bo abuutiigwe kūkyeni? Himma! Syabombiigwe bo akaali ukubuutigwa kūkyeni.\*

11 Ukubuutigwa kūkyeni kyali kimanyilo ikya kunangisya ubugolofu ubu aali nabo, kunongwa jaa lwitiko lwake, bo akaali ukubuutigwa kūkyeni. Ku njila ijo Abulahamu gwise gwa bandu boosa aba bikummwitika Kyala, kokuti aba babaliigwe ubugolofu ku lwitiko, nalinga bakabuutigwa kūkyeni.

12 Abandu aba babuutiigwe kūkyeni, boope Abulahamu gwisabo ndwitiko, somma kunongwa jaa kubuutigwa kūkyeni, looli paapo bammwitiike Kyala bo ulu aalimmwitiike umwene lula, bo akaali ukubuutigwa kūkyeni.

*Abaa ndujungu lwa Abulahamu bikwisa kukaba ikilingo ikya kiisu kyosa*

‡ **4:8 4:7-8** Bala kalata gwa Isabuli 32:1-2. § **4:9 4:9** Bala kalata gwa Ubwandilo 15:6. \* **4:10 4:10** Bala kalata gwa Ubwandilo 15:6; 17:23-27.



13 Kyala aafingile kwa Abulahamu na baa ndajungu lwake, ukuti bikwisa kukaba ikilingo ikya kiisu kyosa.† Leelo batikwisa kukaba ikilingo iki ku njila jaa kukonga indagilo sya Moose, looli ku njila jaa kummwitika Kyala nu kubaligwa ubugolofu.

14 Linga baakabaga ikilingo ku njila jeene ijaa kukonga indagilo isyo, po ukummwitika Kyala ngali kukaja na mbombo najimo. Apo ulufingo lwa Kyala loope ngali lwa itolo,

15 paapo indagilo isyo sikututwalila ingalalisi sya Kyala. Kangi linga sikajapo indagilo, po kutikujapo ukukilania indagilo.

16 Fyobeene ulufingo ulu ulwa Kyala, lukusubila ukummwitika umwene, kokuti lyene iipyana lyake, ukuti ulufingo lwake lwa nalooli ku bandu boosa abaa ndajungu lwa Abulahamu. Somma kwene kuli aba bapeeliigwe indagilo, kokuti abajuuta, looli koope kuli aba bikummwitika Kyala bo ulu aalimmwitiike Abulahamu. Uswa twesa taata jo Abulahamu,

17 bo muno sisimbiigwe mwa Kalata uMwikemo ukuti, “Ngubiikile ukaja gwisabo gwa fikolo fingi.”‡ Abulahamu jo taata nkyeni mwa Kyala ujw aalimmwitiike, Kyala ujw ikubasyasya abandw ukufuma mbafwe, kangi ikupela utundu utu tukaalipo, ukujapo.

18 Na paapo amasyu gaa Kyala gaali makafu ukugasubila, poopo Abulahamu aagiitiike, po Kyala aalimmbiikile ukaja jo gwisabo gwa fikolo

---

† 4:13 4:13 Bala kalata gwa Ubwandilo 22:1-18. ‡ 4:17 4:17 Bala kalata gwa Ubwandilo 17:5.

fingi. Syaboniike bo ulu Kyala aalimmbuulile ukuti, “Abandu abaa ndujungu lwako bikwisa kuya bingi bo ulwa ndondwa.”§

<sup>19</sup> Akabalilo kala, Abulahamu aali nkangale gwa fyinja imia jimo bano. Looli ulwitiko lwake lukaalogotiile, na paapo aameenye ukuti umbili gwake gwafwene ngati gfwile, kangi unkasi gwake Sala aali nngumba.

<sup>20</sup> Kangi akaali ni ndumbula ijaa kwilaamwa ku lufingo ulu aapeeliigwe na Kyala. Looli amaka gaake agaa kummwitika Kyala gaalyongi-ilepo, kangi antuufyaga,

<sup>21</sup> namanga aameenye nalooli ukuti Kyala abagiile ukusibomba isi aalimfingiile.

<sup>22</sup> Fyobeene Kalata uMwikemo ikuti, “Kyala alinkumbala ubugolofu.”\*

<sup>23</sup> Looli inongwa isi sikuti, “Kyala alinkumbala ubugolofu,” sikaja sya Abulahamu mwene,

<sup>24</sup> looli syitu na nuuswe, twe Kyala ikutubala ubugolofu, linga tukummwitika umwene, uju aalinsyusiisye uNtwa gwitu Jesu ukufuma mbafwe.

<sup>25</sup> Kyala aalinningile Jesu ukufwa, ukuti abusoosyepo ubutulanongwa bwitu. Kangi aalinsyusiisye, ukuti uswe tubaligwe ubugolofu.

## 5

### *Ututengaano nu lusubilo*

---

§ 4:18 4:18 Bala kalata gwa Ubwandilo 15:5. \* 4:22 4:22 Bala kalata gwa Ubwandilo 15:6.

1 Po kunongwa jaa kuti Kyala atubalile ubugolofu, ukukongana na kummwitika umwene, tuli na lutengaano nagwe ku njila jaa Ntwa gwitwa Jesu Kilisiti.

2 Jo uja atulongwisye ndwitiko lwitwa, ukwingila mwi ipyana muno tulimo. Muno tukusekela fiijo kunongwa jaa lusubilo lwitwa ulwa kaja na buliilanisi mbusisa bwa Kyala.

3 Sikaja syene sisiisi, looli tukusekela moope mu ngubilo syitwa, paapo tumeenye ukuti ingubilo sikongelapo uluumiililo lwitwa.

4 Uluumiililo lukutwala ukukaka indumbula, ukukaka indumbula kukutwala ulusubilo.

5 Ulusubilo ulo lutikutususya, paapo Kyala asiiswisye indumbula syitwa na lugano lwake, ku njila jaa kutupa Mbepo Mwikemo gwake.

6 Kilisiti aaliisile pakabalilo aka Kyala aakabaatiike, alinkutufwila uswe twe tukaja bagolofu, bo tuli batulanongwa.

7 Nalooli, kukafu umundwa ukumfwila umundwa unnunu. Looli pamo umundwa abagiile ukumfwila umundwa unnunu fiijo.

8 Looli Kyala atunangiisye ukuti atuganile fiijo, ku njila jaa kuntama Kilisiti ukutufwila bo tuli batulanongwa.

9 Po linga tubaliigwe ubugolofu ku njila jaa kooneka iilopa Iya Jesu, nalooli ku njila jaa Jesu tukwisa kwepuka ingalalisi ingali isya Kyala, na kupokigwa.

10 Akabalilo kala, bo tuli balugu baa Kyala, aatufwenie nagwe ku njila jaa bufwe ubwa Mwanaake. Fyobeene nalooli tukwisa

kupokigwa ukwepuka ingalalisi sya Kyala, ku njila jaa buumi ubwa Mwanaake.

<sup>11</sup> Sikaja bo ulo itolo, looli poope tukusekela mwa Kyala ukwendela ku Ntwa gwitũ Jesu Kilisiti, ujũ atufwenie na Kyala.

*Atamu aatwele ubufwe looli Jesu atwele ubuumi*

<sup>12</sup> Atamu bo atulile inongwa, ubutulanongwa bwalingiile pakiisũ ku njila jaa mundũ ujũ jũmojwene, bulinkututwalila ubufwe. Fyobeene abandũ boosa bikufwa, paapo boosa batulanongwa.

<sup>13</sup> Moose bo akapeeligwa indagilo, ubutulanongwa bwalipo pakiisũ. Looli linga sikajapo indagilo, abandũ batikulongigwa ku butulanongwa bwabo.

<sup>14</sup> Poope, ukufuma akabalilo akaa Atamu mpaka nkabalilo akaa Moose, ubufwe bwali na maka ku bandũ boosa, boope na bandũ aba bakaatulile inongwa ijaa kukilania indagilo, bo ulũ aabombile Atamu.

Atamu aali kifwanikisyo ikya Kilisiti ujũ aalisile piitaasi.

<sup>15</sup> Looli ubutulanongwa bwa Atamu, ni ipyana lya Jesu filegeene fiijo. Ukwendela mbutulanongwa ubwa mundũ jũmojwene, abandũ bingi baafwile. Ukwendela mwi ipyana lya mundũ jũmojwene Jesu Kilisiti, Kyala abongiilepo abandũ bingi iipyana ni sajo syake.

<sup>16</sup> Kangi iipyana lila lya Kyala lilegeene nu butulanongwa bwa mundũ jũla Atamu. Namanga ubutulanongwa bwake bumobwene

bwatwele kumyitu ubulongi bwa Kyala. Looli iliipyana lila ilya Kilisiti lyatwele kumyitu ukubaligwa ubugolofu, na paapo twali batulanongwa.

17 Ukwendela ubutulanongwa ubwa mundu jumojuwene, ubufwe bulinkwanda ukujja na maka ku bandu boosa. Looli ukwendela ku mundu jumojuwene, Jesu Kilisiti, sya nalooli fiijo, bikutola mbuumi bwabo, abandubala aba bambiliile iliipyana ilingi fiijo nu kubaligwa ubugolofu.

18 Po leelo, bo ulu abandubala boosa bikulongigwa kunongwa jaa butulanongwa bumobwene, bo lululo abandubala boosa kubaligwa ubugolofu nu kapeeligwa ubuumi kunongwa jaa mbombo jimojeene ijaa bugolofu.

19 Po leelo, bo ulwa bandu bingi baali batulanongwa, kunongwa jaa mundu jumojuwene ujja aalinkaanile Kyala, bo lululo Kyala ikwisa kubapela ukujja bagolofu abandubala bingi, kunongwa jaa mundu jumojuwene ujja aalintiilile Kyala.

20 Indagilo sya Moose syatwaliigwe ukuti ubutulanongwa bongelepo. Looli ubutulanongwa bo bongeliile, lyope iipyana lya Kyala lilinkukindilila ukongelapo.

21 Fyobeene bo ulu ubutulanongwa bwali na maka ukutwala ubufwe, bo lululo iipyana lili na maka ukubabala abandubala ubugolofu, nu kubapa ubuumi bwa bwila na bwila, ku njila jaa Ntwa gwitwa Jesu Kilisiti.

## 6

### *Ƴkufwa nũ kũsyũka pamopeene na Kilisiti*

<sup>1</sup> Po tũti fiki? Bũle, twendelelege Ƴkũbomba Ƴbũtulanongwa Ƴkũti iipyana Iya Kyala libaalege?

<sup>2</sup> Himma na panandi! Ƴswe tukaja nũ bũliilansi mbũtulanongwa, tũfwene bo Ƴlwa bafwe kũ bũtulanongwa. Tũbagiile bũleebũle Ƴkwendelela Ƴkũja mbũtulanongwa?

<sup>3</sup> Bũle, mukamanya Ƴkũti Ƴswe twesa bo toosiigwe, tũlungiigwe na Kilisiti Jesu mbũfwẽ bwake?

<sup>4</sup> Paapo toosiigwe mbũfwẽ bwake, nuuswe tũsyiliigwe pamopeene nagwe. Namanga bo Ƴlũ Kilisiti aasyũkile kũ maka amakũlũmba agaa Kyala, bo lũlũlo nuuswe tukaja nũ bũũmi Ƴbũpya.

<sup>5</sup> Po linga Ƴswe tũbiikiigwe pamopeene nagwe mbũfwẽ bwake, bũbũbo tukwisa kũsyũsigwa Ƴkũja pamopeene nagwe.

<sup>6</sup> Nalooli bo toosiigwe, Ƴbũndũ bwitũ Ƴbwa ijolo bwakomeleliigwe pa kikohekano, Ƴkũti Ƴbũndũ Ƴbwa bũtulanongwa boomoligwe. Po leelo twalekile Ƴkũja batũmwa baa bũtulanongwa.

<sup>7</sup> Namanga Ƴmundũ linga Ƴbũndũ bwake Ƴbwa ijolo bũfwile, Ƴbũtulanongwa bũtikũja nũ bũlagili kũmyake.

<sup>8</sup> Linga Ƴswe twafwile bo Ƴlo pamopeene na Kilisiti, tukwitika Ƴkũti aatukũja nũ bũũmi pamopeene nagwe.

9 Tumeenye ukuti Kilisiti aasyukile, atikwisa kufwa kangi, ubufwe bukaja na bulagili kangi kumyake.

10 Bo afwile, aafwile kamokeene, kaafwene ukubutola ubulagili ubwa butulanongwa. Akabalilo aka muumi, ubuumi bwake buli mbuliilani na Kyala.

11 Bubuabo na nuumwe mwibonege ukuti mufwile pamopeene na Kilisiti, ubutulanongwa bukaja na bulagili kumyinu na panandi. Kangi mwibonege ukuti muli buumi mbuliilani na Kyala mwa Kilisiti Jesu.\*

12 Po leelo mulingabulekaga ubutulanongwa ukugilagila imibili gyinu, igi aagikufwa, pamo ukukonga ifinyonyo fyake ifibiibi.

13 Mulingabombelaga utumbakaasya utwa mibili gyinu ubutulanongwa ni mbiibi. Looli mwinigege kwa Kyala, ukuti mubombelege utumbakaasya twinu isya bugolofu. Namanga musyusiigwe na Kyala, ukuti muje na buumi ubupya.

14 Ubutulanongwa bukaja na bulagili kumyinu, paapo mukulongosigwa ni ipyana, somma ni ndagilo.

### *Ukaja batumwa baa bugolofu*

15 Po tuti fiki? Linga tukulongosigwa ni ipyana, somma ni ndagilo, bule tukwitikisigwa ukubomba ubutulanongwa? Himma na panandi!

---

\* **6:11 6:11 Mwa Kilisiti Jesu** Bala ku Isyakulingaania.

16 Bule, mukamanya ukuti linga mwiningile ku mundu jumo ukubomba isi ikulonda, po muli batumwa baake? Mubagiile ukuja batumwa baa butulanongwa nu kufwa, pamo mubagiile ukuja batumwa baa Kyala nu kummwimika umwene, ukuti mubaligwe ubugolofu.

17 Kyala atuufigwege! Mwali batumwa baa butulanongwa, looli akabalilo aka musikolile mu ndumbula imanyisyo isi mwapeeliigwe.

18 Mwabuliigwe ukufuma mbatumwa ubwa butulanongwa, muli batumwa baa bugolofu.

19 Ngujoba nkifwanikisyo iki ikya batumwa, paapo umwe mukaali ukusyagania kanunu. Ijolo mwabombelaga utumbakaasya utwa mibili gyinu, ukuja tumwa twa bunyali nu bubiibi, ukubomba ubutulanongwa. Looli akabalilo aka utumbakaasya twinu tajege tumwa twa bugolofu, ukuti muje biikemo.

20 Akabalilo kala mwali batumwa baa butulanongwa, mukaalongosigwaga nu bugolofu.

21 Akabalilo kala, mwabombaga imbombo isi akabalilo aka mukwaga soni. Mwakabilemo ifiki? Isi sikuboneka ndi sila bo bufwe!

22 Looli akabalilo aka, mwabuliigwe ukufuma mbutulanongwa, muli batumwa baa Kyala. Ifya kukabamo ko kaja biikemo, nu kapeeligwa ubuumi bwa bwila na bwila.

23 Namanga umfwalo gwa butulanongwa bo bufwe. Looli ifyabupe fya Kyala bo buumi bwa bwila na bwila, ukwendela mu Ntwa gwitw Kilisiti Jesu.



## 7

*Aba bikulongosigwa na Jesu bakaja paasi pa ndagilo sya Moose*

<sup>1</sup> Baamyitu ndwitiko, ngujoba na nuumwe, mwe musimeenye indagilo. Mumeenye ukuti umundu ikulondigwa ukusikonga indagilo bo aliko kwene ku buumi.

<sup>2</sup> Bo ulwa kifwanikisyo ikya lulagilo ulwa bwegi, unkiikulu akabagila ukunndeka undume bo akaali muumi. Looli linga undume afwile, po unkiikulu ikwabuligwa ukufuma ndulagilo ulwa bwegi.

<sup>3</sup> Kokuti linga ikwegigwa nu nnyambala ujungi bo undume akaali muumi, ujo ndogwe. Looli linga undume afwile, ali nu bwabuke ndulagilo lula. Nalinga ikwegigwa nu jungi, atikuja ndogwe.

<sup>4</sup> Baamyitu, bubuubo kumyinu, nuumwe mufwile ku ndagilo, muli baabuke ku njila jaa bufwe bwa Kilisiti. Po nuumwe muli baa uju aasyukile ukufuma mbufwe, ukuti uswe twesa tupege iseke inunu kwa Kyala.

<sup>5</sup> Akabalilo kala, ubundu bwitu ubwa butulanongwa bwatulongosyaga, kangi indagilo syafipelile ifinyonyo ifibiibi ukabomba imbombo mmibili gyitu. Jo nongwa iji twapaga iseke imbiibi isi sikutwala ubufwe.

<sup>6</sup> Twapinyigwe ni ndagilo, looli akabalilo aka tufwile pamopeene na Kilisiti, kunongwa ijo tuli baabuke ku ndagilo isi syatupinyaga. Akabalilo aka tutikummbombela Kyala ku njila ijaa ijolo ijaa kukola indagilo isi syasimbiigwe,

looli tukumbombela Kyala ku njila imbya ijaa kulongosigwa na Mbepo Mwikemo.

*Abandu boosa bikulagiligwa nu butulanongwa*

<sup>7</sup> Po tuti fiki? Bule, tuti indagilo mbi-ibi? Himma, bukaja bwanalooli na panandi! Nalooli linga indagilo sikaalipo, une ngali ngamanya ukuti ubutulanongwa fyo fiki. Namanga linga lukaalipo ululagilo ulu lukuti, "Ulinganyonywaga akandu akaa nnino,"\* une ngali ngamanya ukuti ukunyonywa akandu akaa mwinangu butulanongwa.

<sup>8</sup> Looli bo nsimeenye indagilo, po ubutulanongwa bulinkufisambula ifinyonyo ifibiibi ifya luko nu luko nkati mu ndumbula jangu. Po linga indagilo sikajapo, ubutulanongwa bukaja na maka.

<sup>9</sup> Amasiku agaa uko kunyuma, naatuugalaga kisita kusimanya indagilo sya Kyala. Looli bo nsimeenye indagilo, ubutulanongwa bulinkuja nu bulagili kumyangwa,

<sup>10</sup> ndinkufwa, ndinkusibona indagilo isyo, isi syali sya kumba ubuumi, ngimba sikumba ubufwe.

<sup>11</sup> Namanga ku njila jaa ndagilo isyo, ubutulanongwa bulinkusyoba une nu kuungoga.

<sup>12</sup> Po leelo sili pabwelu ukuti, indagilo sya Kyala nyiikemo, nunu, kangi sya bwanalooli.

---

\* **7:7 7:7** Bala kalata gwa Ukusooka 20:17; Ukukumbuka Ingomeelesyo 5:21.

13 Bule, akandu akanunu ako kaalindwaliile ubufwe? Himma na panandi! Ubutulanongwa bo ubu bwalindwaliile ubufwe ukwendela ku ndagilo sila inunu, ukuti buboneke ukuya bo butulanongwa. Ku njila jaa ndagilo, ubutulanongwa bwasisimikisiigwe ukuya butulanongwa nalooli.

*Jesu ikubapoka abandu ukufuma mbulagili ubwa butulanongwa*

14 Tumeenye ukuti indagilo sya Moose syafumile kwa Kyala, looli une ndi mundu itolo, une nwalisiigwe ukuya ntamwa gwa butulanongwa.†

15 Isi ngubomba nalooli une ndikwibona. Niiganile ukubomba inunu, leelo ndikubomba. Looli isi ngasigana syo isi ngubomba.

16 Paapo une ngubomba isi ngasigana, po sikunangisya ukuti ngwitika, ukuti indagilo nunu.

17 Po ndikuya jo une ne ngubomba isi ngasigana, looli butulanongwa ubu buli nkati mmyangu.

18 Mmeenye ukuti nkati mmyangu, kokuti mbundu bwangu ubwa butulanongwa, kakajamo akandu akanunu kokoosa. Namanga niiganile ukubomba inunu, leelo ndikubomba.

19 Po ndikubomba inunu isi niiganile, looli ngubomba imbiibi isi ngiigana ukusibomba.

20 Paapo une ngubomba isi ngasigana, po sikunangisya ukuti ndikuya jo une ne ngubomba isyo, looli bukuya butulanongwa ubu bulimo nkati mmyangu.

---

† 7:14 7:14 *Untumwa gwa butulanongwa* Bala iisya *Untumwa* ku Isyakulingaania.

<sup>21</sup> Po leelo nkabwene akandu aka: Bo ngulonda ukubomba akandu akanunu, ngukwabigwa ukubomba akandu akabiibi.

<sup>22</sup> Indagilo sya Kyala nsiganile ni ndumbula jangu joosa.

<sup>23</sup> Looli utumbakaasya utwa mbili gwangu tukulongosigwa na maka agaa butulanongwa aga gikupingana ni nyiinogono. Fikumbela ukaja ntumwa gwa kubabombela ubutulanongwa ubu bukubomba imbombo mu mbili gwangu.

<sup>24</sup> Ahiili une! Jo jwani ugwa kumboka une, nsookemo mbundu ubu bukulongosigwa nu bufwe?

<sup>25</sup> Kyala atuufigwege, uju ikumboka ku njila jaa Ntwa gwitw Jesu Kilisiti!

Namanga une ndi ntumwa gwa ndagilo sya Kyala mu nyiinogono syangu, looli mbundu bwangu, ndi ntumwa gwa ndagilo isya butulanongwa.

## 8

### *Ukulongosigwa na Mbepo Mwikemo*

<sup>1</sup> Po leelo, akabalilo aka, kukajako ukupeeligwa ulufundo abandu aba balungeene na Kilisiti Jesu.

<sup>2</sup> Namanga Mbepo Mwikemo uju ikubapa ubuami bwa bwila na bwila, aambiikile ukaja mwabake mwa Kilisiti Jesu, ukufuma mbutulanongwa na mbufwe.

<sup>3</sup> Indagilo sya Moose sikaabagiile ukutupoka, kunongwa jaa boonywa ubwa bundu bwitu ubwa butulanongwa. Looli Kyala atupokile.

Aalintumile uMwanaake juuho, ukuya nu mbili bo ugwa bandu, ukuti aje ikemo ilya kuboologwa ilya kubusoosyapo ubutulanongwa. Ku njila iyi aabulongile ubutulanongwa.

<sup>4</sup> Kyala aabombile bo ulo ukuti ingolofu isi sikulongigwa ni ndagilo sya Moose sibombigwe pakati pamyitu, uswe twe tukulongosigwa na Mbepo gwake, somma ku maka agaa bundu bwitu ubwa butulanongwa.

<sup>5</sup> Namanga aba bikulongosigwa nu bundu bwabo ubwa butulanongwa, inyiinogono syabo sikulonda ukutula inongwa. Looli aba bikulongosigwa na Mbepo Mwikemo, inyiinogono syabo sikulonda isi sikankyela Mbepo ujo.

<sup>6</sup> Umundu uju ikulongosigwa nu bundu bwake ubwa butulanongwa, ummaliikisyo gwake bo bufwe bwene. Looli uju ikulongosigwa na Mbepo Mwikemo, ikakaba ubuumi nu lutengaano.

<sup>7</sup> Po uju ikulongosigwa nu bundu ubwa butulanongwa, umwene jo ndugu gwa Kyala. Umundu ujo atikusitiila indagilo isya Kyala, akabagila ukusitiila.

<sup>8</sup> Uju ikulongosigwa nu bundu ubwa butulanongwa akabagila ukankyela Kyala.

<sup>9</sup> Looli umwe mutikulongosigwa nu bundu ubwa butulanongwa, looli mukulongosigwa na Mbepo gwa Kyala, linga Mbepo ujo ikutugala nkati mmyinu. Looli umundu gwesa uju akaja na Mbepo ujo, uju jo Mbepo gwa Kilisiti, umundu ujo akaja gwake.

10 Linga Kilisiti ikutuugala nkati mmyinu, Kyala ababalile ubugolofu, na Mbepo Mwikemo ikubapa ubuumi bwa bwila na bwila, na paapo imibili gyinu gifwile kunongwa jaa butulanongwa.

11 Kangi linga Mbepo gwa Kyala, ujū aalinsyusiisye Jesu, ikutuugala nkati mmyinu, po Kyala ujū aalinsyusiisye Kilisiti ukufuma mbafwe ikwisa kugipa imibili gyinu ubuumi, ku njila jaa Mbepo gwake ujū ali nkati mmyinu.

12 Baamyitu ndwitiko, uswe tutikulondigwa ukutuugala mbuumi ubu bukulongosigwa nu bundu bwitu ubwa butulanongwa.

13 Namanga linga mukutuugala mbuumi ubu bukulongosigwa nu bundu ubwa butulanongwa, mukwisa kufwa. Looli linga ku maka agaa Mbepo Mwikemo, mukusigoga imbombo imbiibi, aamukujaga buumi bwila na bwila.

14 Boosa aba bikulongosigwa na Mbepo gwa Kyala bo baana baa Kyala.

15 Namanga Mbepo ujū mwapeeliigwe, akaabapelile kangi ukujā batumwa aba bali nu lutende. Looli abapelile umwe ukujā baana baa Kyala, na kuli ujo tukunkoolela Kyala ukuti, “Abba,” kokuti, “Taata.”

16 Mbepo Mwikemo juujo ikusisimikisya mu ndumbula syitu ukuti, uswe tuli baana baa Kyala.

17 Po linga uswe tuli baana baa Kyala, tuli baa kilingo ikya Kyala. Nalooli tukwisa kwingilapo ikilingo pamopeene na Kilisiti, linga uswe tuli baliilanisi mu ngubilo syake, ukuti tujē baliilanisi moope na mbusisya bwake.

*Kyala ikwisa kubapa ubusisya abaanaake*

<sup>18</sup> Ingubilo isya kabalilo aka ngusibona ukuti kandu kaa itolo, ukufwanikisya nu busisya ubu Kyala ikwisa kutusetulila.

<sup>19</sup> Ifipeligwa fyosa fikuguulila ndusubilo akabalilo aka Kyala ikwisa kubasetula pabwelu abaanaake ukuti bo baani.

<sup>20</sup> Namanga ifipeligwa fyosa fyalyandwike filinkuja fya mwalo, somma ku bwigane bwabo, looli ku bwigane bwa Kyala juju. Po fikuguulila ndusubilo,

<sup>21</sup> ukuti fiise kubikigwa mbwabuke ukufuma mbutumwa bwabo ubwa loonangiko, ukuti fije nu bwabuke ubukulumba bwa baana baa Kyala.

<sup>22</sup> Tumeenye ukuti ukufika akabalilo aka, ifipeligwa fyosa fikulila ku lubabo bo ulwa nkiikulu uju ali pakupaapa.

<sup>23</sup> Na nuuswe, twe tupeeliigwe Mbepo Mwikemo, tukulila fijo mu ndumbula syitu kuno tukunnguulila Kyala ukuti atupele ukuja baanaake, kokuti ikwisa kutwabula nu kutupa imibili imipya.

<sup>24</sup> Ubusubilo ulu tuli nalo ukwandila apa Kyala aatupokile. Looli linga tukabwene aka tukukasubila, kukajako ukuguulila. Bale, jo jwani uju ikusubila ukupeeligwa akandu aka ali nako?

<sup>25</sup> Looli linga tukusubila ukupeeligwa akandu aka tutukabona, po tukuumilila ukuguulila.

<sup>26</sup> Bubuho Mbepo Mwikemo ikututuula mboonywa bwitu. Namanga tukamanya ukwipuuta bo muno Kyala ikulondela, looli

Mbepo jũjo ikutwipuutila ni kitima iki ukabagila ukukilingaania.

<sup>27</sup> Kyala ujũ asimeenye isi silimo mu ndumbula sya bandũ, asimeenye syope ni nyiingono isya Mbepo gwake. Namanga Mbepo ujũ ikubiipuutila abiitiki ukukongana nũ bwigane bwa Kyala.

<sup>28</sup> Tũmeenye ukuti, kuli syosa Kyala ikubabombela inunu abandũ aba bannganile, aba ababilikiile ukukongana ni nyango jaake.

<sup>29</sup> Namanga Kyala aatalile ukubamanya abasunguligwa baake bo akaali ukukipela ikiisũ. Aabasungwile ukuti bajege bo muno uMwanaake ajiliile, ukuti ujũ ajege nkũlũmba pakati pa baana boosa abaa Kyala.

<sup>30</sup> Po leelo aba aabasungwile, bo aba aababilikiile. Aba aababilikiile, bo aba aababalile ubugolofu. Kangi aba aababalile ubugolofu, bo aba aabapeele ubũsisya bwake.

*Akajako ugwa kutũpaagũla ndũgano lwa Kyala*

<sup>31</sup> Liilino tuti fiki kũ nongwa isyo? Linga Kyala ali pamopeene na nuuswe, bũle, jo jwani aikututola?

<sup>32</sup> Kyala akaalimpaakiisye uMwanaake ukufundigwa, looli aalinsoosiisye ukuti atufwile uswe twesa. Linga aatũpeelee uMwanaake ukutufwila uswe, nalooli ikwisa kutũpa utundũ toosa.

<sup>33</sup> Bũle, jo jwani ujũ aikũmela ukuti abasunguligwa baa Kyala balongigwe? Akajako najũmo, namanga Kyala jũjo jo ujũ ababalile ubugolofu.



34 Bule, jo jwani ujũ aikubasitaaka abasunguligwa baa Kyala? Akajako najũmo, namanga jo Kilisiti Jesu, ujũ aafwile nũ kusyũka, atũugeele kukibafu ikiiliilo ikya Kyala pabũjo ubwimikigwa fiijo, uko ikutwipuutila uswe.

35 Fyo filiku ifi fibagiile ukutupaagula ndugano ulwa Kilisiti? Bule, ubutolwe, pamo ubukamandanigwa, pamo ingubilo, pamo injala, pamo ukusita kũja ni myenda, pamo ukufwimigwa, pamo ukugogigwa?

36 Bo muno sisimbiigwe mwa Kalata uMwikemo ukuti,

“Amasiku goosa tukufwimigwa,  
paapo tukukubombela ugwe.

Uswe tukubombeligwa kabiibi,

bo ulwa ng'oosi isya kubooligwa.”\*

37 Looli kulũ syosa isi uswe tukutola fiijo, ukwendela mwa Kilisiti ujũ atuganile.

38 Namanga nsyageenie nalooli ukuti kakajako akandu aka kabagiile ukutupaagula ndugano lwa Kyala. Linga tũli bũumi, pamo linga tufwile, aatutikupaaguligwa. Akajako ugwandumi, pamo undagili gwa nkiisu muno, pamo utundu utũ tukubombigwa akabalilo aka, pamo utũ tukwisa piitaasi,

39 pamo utundu utwa kũmwanya, pamo utundu utwa kũ busyũka, pamo ikipeligwa ikingi kyokyosa iki kibagiile ukutupaagula ndugano lwa Kyala, ulũ alusetwile ukwendela mwa Kilisiti Jesu, uNtwa gwiũ.

---

\* 8:36 8:36 Bala kalata gwa Isabũli 44:22.

## 9

*Kyala aabasungwile aBanyaisilaili ukuya bandu baake*

<sup>1</sup> Kilisiti nkeeti gwangu ukuti ngujoba isya nalooli, indumbula jangu jikuu sisimikisya jikulongosigwa na Mbepo Mwikemo ukuti ndikutungulapa.

<sup>2</sup> Nsulumeenie fijo nu kubabigwa ukusita kumalika mu ndumbula.

<sup>3</sup> Naabagiile ukuhoboka ukugunigwa na Kyala nu kusosigwamo mwa Kilisiti ukuti abandu abaa nkikolo kyangu bapokigwe!

<sup>4</sup> Abo bo Banyaisilaili. Bo aba Kyala aababiikile ukuya baanaake. Aali pamopeene nabo mbasisya bwake. Bo aba Kyala aabiikile ulwitikano nabo, nu kubapa indagilo syake, nu kufinga kumyabo, nu kubalagila muno bikulondeligwa ukummwipuuta.

<sup>5</sup> ABanyaisilaili abo, baa ndujungu lwa Abulhamu, Isaka na Jaakobo. Joope Kilisiti afumile ndujungu lwabo. Jo Kyala, uNkulumba gwa fyosa. Atuufigwege bwila na bwila! Ameni.

<sup>6</sup> Bule, Kyala aatoliigwe ukubomba isi aafingile ku Banyaisilaili? Himma! Paapo abaa ndujungu lwa Abulhamu bamo bakaja basunguligwa baa Kyala.

<sup>7</sup> Kangi abaa ndujungu lwa Abulhamu bamo batikubaligwa ukuya baanaake, paapo Kyala aalimmbulile Abulhamu aatile, "Udujungu lwako lukufuma kwa Isaka."\*

\* 9:7 9:7 Bala kalata gwa Ubwandilo 21:12.

<sup>8</sup> Kokuti, abaana bamo aba aabapaapile Abulahamu bakaja baana baa Kyala. Looli aba bapaapiigwe ukukongana na muno Kyala aafingiile kwa Abulahamu, bo aba bikubaligwa ukujaja baana baa Kyala.

<sup>9</sup> Namanga ulufingo ulwene lukuti, “Angugomokelako nkabalilo aka nkabaatiike, Sala aikujaga nu mwana unnyambala.”†

<sup>10</sup> Kangi sikaja syo isyo itolo. Umwana ujo jo Isaka, unkasi gwake Lebeka aalimpaapiile abaana babili abiipasya.

<sup>11-12</sup> Bo bakaali ukupaapigwa abiipasya abo, Kyala alinkumbwula Lebeka ukuti, “Unkulumba ikwisa kumbombelaga unnandi.”‡ Kyala bo ikujoba isyo, abaana abo bo bakaali ukubomba nasimo inunu pamo imbiibi. Isi sikunangisya ukuti Kyala ikusungula abandu ukukongana nu bwigane bwake. Batikusunguligwa ukukongana ni mbombo syabo, looli bikusunguligwa na ujũ ikubabilikila.

<sup>13</sup> Jo nongwa iji Kalata uMwikemo ikuti, “Jaakobo naalinnganile, looli Esabu naalinkaanile.”§

### *Kyala ngolofu*

<sup>14</sup> Po tuti fiki? Bule, tutigi Kyala akaabombile isya bwanalooli? Himma na panandi!

<sup>15</sup> Namanga aalimbwulile Moose aatile,  
“Une ndi nu lupakisyo  
ku mundu ujũ niiganile ukumpaakisyu,

† 9:9 9:9 Bala kalata gwa Ubwandilo 18:10, 14. ‡ 9:11-12

9:11-12 Bala kalata gwa Ubwandilo 25:23. § 9:13 9:13 Bala kalata gwa Malaki 1:2-3.

kangi ngumpelela ikisa

umundu ujũ niiganile ukumpelela ikisa.”\*

16 Akapala kyo kisa ikya Kyala, bukaja bwigane bwa bandũ, pamo ukwijũũla kwabo abeene.

17 Kangi mwa Kalata uMwikemo aalimmbũũlile Falao aatile, “Naakubiikile ukũja malafyale ukũti ku njila jaako mbanangisye abandũ amaka gangũ, nu kũti ingamu jangũ jifumusigwege ikiisu kyosa.”†

18 Po leelo tumeenye ukũti Kyala ikũmpaakisya umundu gwesa ujũ abaatiike ukũmpaakisya, nu kũmpelera ubũkafu indumbula ujũ abaatiike ukũmpelera ubũkafu.

### *Ingalalisi ni kisa kya Kyala*

19 Pamo ubagiile ukũundaalusya ukũti, “Linga sili bo ulo, fiki Kyala ikũtulonga? Namanga akajako umundu ujũ abagiile ukũsisigila imbaatiko sya Kyala.”

20 Ugwe uli mundũ itolo! Bule, ubagiile bũleebũle ukũtolana na Kyala? Bule, ikipeligwa kibagiile ukũtolana na ujũ aakipelile nu kũlaalusya ukũti, “Fiki umbelile bo ulu?”‡

21 Bule, umbũmba ndeko atikũmbũmba muno iiganiile? Indeko jimo ikũjibũmba ku mbombo ijaa kwimikigwa, ijingi ku mbombo isita kwimikigwa.

22 Bo sili kwa Kyala. Aalondaga ukũbanangisya abandũ ingalalisi syake na maka gaake, looli aba-

---

\* 9:15 9:15 Bala kalata gwa Ukũsooka 33:19. † 9:17 9:17 Bala kalata gwa Ukũsooka 9:16. ‡ 9:20 9:20 Bala kalata gwa Jeesa 29:16.

keeteliile fijo aba baalondigwaga ukulongigwa nu kupyutigwa.

<sup>23</sup> Kangi aalondaga ukubusetula ubusisya bwake ubukulumba, kuli aba aalondaga ukubapelela ikisa, aba aabatendekiisye kilingaani ukubapapo ubusisya bwake.

<sup>24</sup> Abandu abo, bo aba aabasungwile, kokuti uswe twesa twe Bajuuta na aba bakaja Bajuuta.

<sup>25</sup> Isi syo isi Kyala aajobile mwa kalata ugwa nkunguluka Osija ukuti,

“Aba bakaja bandu bangu,  
ngubatigi, ‘Bandu bangu.’

Abandu aba ngaabaganile,  
ngubatigi, ‘Bakundwe bangu.’” §

<sup>26</sup> Kangi,

“Pabujo ubu baajobigwaga ukuti,  
‘Umwe mukaja bandu bangu,’

po apa aabikujobigwaga ukuti,  
‘Baana baa Kyala uMuumi.’” \*

<sup>27</sup> Joope unkunguluka Jeeseja ikujoba sisiisyo ku Banyaisilaili ikuti,

“Nalinga aBanyaisilaili bingi bo ulwa nsanga ugwa kumbali ku nyanja,  
poope abandu aba aabikupokigwa banandi.

<sup>28</sup> Namanga uNtwa Kyala ikwisa kubapa ulufundo ulusita kwagilwa

abandu abaa pakiisu apa, kisita kukaabila.” †

<sup>29</sup> Bo muno aajobiile ijolo unkunguluka Jeeseja ukuti,

---

§ 9:25 9:25 Bala kalata gwa Osija 2:23. \* 9:26 9:26 Bala kalata gwa Osija 1:10. † 9:28 9:27-28 Bala kalata gwa Jeeseja 10:22-23.

“Linga uNtwa uMwene maka goosa akaasyesye  
bamo abaa ndujungu lwitu,  
ngali tupyutiigwe loosa bo ulwa bandu abaa mu  
Sotoma na Gomola.”‡

*Isi syabapelile aBanyaisilaili bamo ukusita  
kubaligwa ubugolofu*

<sup>30</sup> Bule, tuti fiki? Na paapo abandū aba bakaja Banyaisilaili bakaaliijūulile ukuti babaligwe ubugolofu na Kyala, poope Kyala aabalile ubugolofu ku nongwa jaa lwitiko lwabo.

<sup>31</sup> Kangi kokuti, aBanyaisilaili aba biijuulaga ukusikonga indagilo ukuti babaligwe ubugolofu, baatoliigwe ukusikonga indagilo sila.

<sup>32</sup> Fiki bakaabaliigwe ubugolofu? Paapo biijuulaga ukusikonga imbombo sya ndagilo, kisita lwitiko kwa Kyala. Balinkwitika pi ibweŶ lila iikulumba, balinkugwa.

<sup>33</sup> Bo muno sisimbiigwe mwa Kalata uMwikemo ukuti,

“Namukeete, uko nkaaja akaa mu Syoni,\*  
mbiikile iliibwe ili abandū aabikwitikan-  
gapo,  
ili aalikubapelelaga abandū ukugwa.

Looli umundū gwesa uju ikummwitika uju jo  
ibwe ilyo,  
atikwisa kusukamo siku!”†

‡ 9:29 9:29 Bala kalata gwa Jeeseja 1:9; Ubwandilo 19:24-25.  
Ŷ 9:32 9:32 Iibwe Kokuti Kilisiti. \* 9:33 9:33 Syoni ngamu ijingi  
ijaa Jelusalemu. † 9:33 9:33 Bala kalata gwa Jeeseja 8:14; 28:16.

## 10

<sup>1</sup> Baamyitu ndwitiko, ngunyonywa mu ndumbula jangu ukuti abinangu abo abanyaisilaili bapokigwe. Isyo syo isi ngusuma ukuti Kyala asibombe.

<sup>2</sup> Nikubabwala umwe, abandũ abo bikwija ula ukunkonga Kyala, looli bakamanya muno Kyala ikulondela ukunkonga.

<sup>3</sup> Abeene bakaabwageenie ubugolofu bwa Kyala, bakaaliibikile paasi pa bugolofu bwake. Looli biilondelaga ubugolofu bwabo abeene.

<sup>4</sup> Namanga Kilisiti jo bumalikilo bwa ndagilo, ukuti abandũ boosa aba bikummwitika babaligwe ubugolofu.

### *Abandũ boosa babagiile ukupokigwa*

<sup>5</sup> Ukubaligwa ubugolofu ku njila jaa kusikonga indagilo, Moose aasimbile aatile, “Umundu gwesa ujũ ikusikonga indagilo syosa, ikujaga nu buumi ku njila jaa kusikonga.”\*

<sup>6</sup> Looli ukubaligwa ubugolofu ku njila ijaa lwitiko, Kalata uMwikemo ikuti, “Mulingiilaalusyaga mu ndumbula syinu ukuti, ‘Jo jwani abagiile ukufyuka kumwanya?’ ” Kokuti ukuntwala Kilisiti pakiisu.

<sup>7</sup> “Pamo ukuti, ‘Jo jwani ugwa kusuluka mpaka ku busyuka?’ ” Kokuti ukunsyasya Kilisiti ukufuma mbafwe.†

<sup>8</sup> Looli Kalata uMwikemo ikuti fiki? Ikuti, “Isyu lya Kyala lili kifuki na nungwe, lili nkanwa

---

\* **10:5 10:5** Bala kalata gwa Abanyaleebi 18:5. † **10:7 10:6-7** Bala kalata gwa Ukukumbuka Ingomeelesyo 30:12-13.

mmyako na mu ndumbula jaako.”‡ Kokuti jo ndami jaa kummwitika Kilisiti, iji tukufumusya.

9 Po linga kujoba na kanwa kaako ukuti, “Jesu jo Ntwa,” nu kwitika mu ndumbula jaako ukuti Kyala aalinsyusiisye ukufuma mbafwe, kupokigwa.

10 Namanga mu ndumbula umundu ikwitika, po ikubaligwa ubugolofu, kangi na kanwa kaake ikujoba, po ikupokigwa.

11 Kalata uMwikemo ikuti, “Umundu gwesa uju ikummwitika atikwisa kusukamo siku.”§

12 Namanga bakaleganapo uNjuuta na uju akaja Njuuta. UNtwa ali jamojwene, jo Ntwa gwa bandu boosa, ikubasaja boosa aba bikunsuuma.

13 Bo muno sisimbiigwe mwa Kalata uMwikemo ukuti, “Kukuti mundu uju ikusumuila mu ngamu jaa Ntwa, ikupokigwa.”\*

14 Po abandu babagiile buleebule ukunsuuma, linga bakammwitika? Kangi babagiile ukummwitika buleebule, linga bakapilikamo indumi jaake? Babagiile ukupilika buleebule, linga bakalumbililigwa?

15 Kangi babagiile buleebule ukulumbililigwa, linga abandu bakatumigwa kukubalumbilila? Fyobeene Kalata uMwikemo ikuti, “Kununu fiijo ukwisa kwa bandu aba bikulumbilila iNdami iNunu!”†

‡ **10:8 10:8** Bala kalata gwa Ukukumbuka Ingomeelesyo 30:14.

§ **10:11 10:11** Bala kalata gwa Jeosaja 28:16. \* **10:13 10:13** Bala kalata gwa Joeli 2:32. † **10:15 10:15** Bala kalata gwa Jeosaja 52:7.



16 Leelo aBanyaisilaili bamo bakaaliitiike iNdumi iNunu ijaa Jesu. Namanga ukunguluka Jeeseja aajobile aatile, “Gwe Ntwa, jo jwani iitiike indumi jiitu?”‡

17 Po leelo abandũ ukuti biitike, mpaka bapilike indumi ijo. Po ukuti bapilike, mpaka balumbiligwe iNdumi jaa Kilisiti.

18 Leelo ngwilaalusya, bule aBanyaisilaili bakapilikamo? Nalooli baapiliike, namanga Kalata uMwikemo ikuti,  
 “Indumi jibalaniile pakiisu kyosa,  
 amasyu gaabo gaabalaniile ukufika  
 kummaliikisyo ugwa kiisu.”§

19 Kangi ngwilaalusya, bule aBanyaisilaili bakaasyageenie? Baasyageenie paapo Kyala aababwile ukwendela kwa Moose aatile,  
 “Ngubapela ukujja nu buufi,

ku bandũ aba bakaja bandũ bangũ,  
 ngubakalasya fiijo umwe,

ku bandũ aba bakamanya.”\*

20 Kangi ukunguluka Jeeseja ikujoba ku bukifu ikuti,

“Abandũ aba bakaandondaga,  
 bo aba baambwene.

Abandũ aba batikulaalusya inongwa syangu,  
 niisetwile kumyabo.”†

21 Looli isya Banyaisilaili, Kyala ikuti,

“Umuusi goosa naabagolokiisye amaboko gangũ,  
 abandũ aba batikũnyimika,

---

‡ 10:16 10:16 Bala kalata gwa Jeeseja 53:1. § 10:18 10:18

Bala kalata gwa Isabuli 19:4. \* 10:19 10:19 Bala kalata gwa Ukukumbuka Ingomeesyo 32:21. † 10:20 10:20 Bala kalata gwa Jeeseja 65:1.

kangi baa lukaani.”‡

## 11

*Kyala akabaleka abandũ baake aBanyaisilaili*

<sup>1</sup> Po leelo ngubalaalusya nguti, bũle, Kyala abalekile abandũ baake? Himma na panandi! Ɖne niine ndi Mwisilaili, ugwa ndujungu ulwa Abulahamu, nkikolo ikya Benjamini.

<sup>2</sup> Kyala akabaleka abandũ baake,\* aba aabasungwile ijolo. Bũle, mukasimanya isi sisimbiigwe mwa Kalata uMwikemo isi sikannjoba Elija, muno aasũmiile kwa Kyala kunongwa jaa Banyaisilaili?

<sup>3</sup> Aatile, “Gwe Kyala, abandũ aba, baabagogle abakunguluka baako nu koonanga ifigemo fyako. Nsyele niimwene, kangi bikulonda ukũungoga niine!”†

<sup>4</sup> Kyala aalimmwamwile bũleebũle? Aatile, “Niibiikiile abandũ 7,000 mu Isilaili aba batikummwipuuta Baali.”‡

<sup>5</sup> Na ulu bo sili akabalilo aka. Balipo banandi aba basyele aba Kyala abasungwile kwi ipyana lyake.

<sup>6</sup> Po leelo, linga tusunguliigwe kwi ipyana lya Kyala, tutikupokigwa ni mbombo isi tukubomba. Linga Kyala aabapokaga abandũ kunongwa jaa mbombo syabo, po ngali iipyana likaja ipyana kangi.

---

‡ **10:21 10:21** Bala kalata gwa Jeesaia 65:2. \* **11:2 11:2** Bala kalata gwa 1 Samweli 12:22. † **11:3 11:3** Bala kalata gwa 1 Abanyafyale 19:10, 14. ‡ **11:4 11:4** Bala kalata gwa 1 Abanyafyale 19:18.

7 Po leelo sili buleebule ulu? ABanyaisilaili baalondaga ukuya bagolofu, looli bakaakabile. Beene aba Kyala aabasungwile, bo aba baakabile. Looli aBanyaisilaili abangi boosa, aabapelile ukuya ni ndumbula ingafu,

8 bo muno sisimbiigwe mwa Kalata uMwikemo ukuti,

“Kyala aabaluleesye bo ulwa bandu aba bagonile utulo,  
aabapelile ukuti balingakeetaga,  
aasindiile imbulukutu ukuti balingapilikaga,  
bali bo ulo mpaka umwisyugu.”§

9 Joopu umalafyale Ndaabiti aatile,  
“Bo bali pa findu fyabo ifya pa lusekelo,  
Kyala afisanusye ukuya ntego,  
untego ugwa kubakola abeene,  
ukwikinyamo nu kubafunda.

10 Amaaso gaabo gabiikigwe ingiisi,  
ukuti balingafibonaga nafimo,  
inyuma syabo sigundamege bwila,  
ku ngubilo syabo.”\*

11 Po ngwilaalusa kangi, bule, aBanyaisilaili bo biikinyilemo, baagwile loosa? Himma na panandi! Abeene bo bankaaniile Kyala, Kyala aabapeele abandu abaa mfikolo ifingi injila ijaa kupokigwa. Aabombile bo ulo ukuti aBanyaisilaili bababonelege ubufi abo.

12 Ukwikinyamo ukwa Banyaisilaili kwatwele iipyana ilingi ku bandu boosa abaa pakiisu, kangi ukugwa kwa Banyaisilaili kwatwele

---

§ 11:8 11:8 Bala kalata gwa Ukukumbuka Ingomeelesyo 29:4; Jeosaja 29:10. \* 11:10 11:9-10 Bala kalata gwa Isabuli 69:22-23.

iipyana ilingi ku bandu abaa mfikolo ifingi. Po abandu boosa aabikukabamo iipyana ukukindapo, aBanyaisilaili bo bammwitiike kangu umpoki.

*Isajo ku bandu aba bakaja Banyaisilaili*

<sup>13</sup> Uu ngujoba na nuumwe mwe mukaja Banyaisilaili. Paapo Kyala aalindumile ukaja ntumigwa gwinu,† ngwituukifya imbombo ijo.

<sup>14</sup> Ngusubila ukuti, pamo aBanyaisilaili biinangu bikubabonelaga ubuufi umwe kuli isi Kyala ikubabombela, ukuti bamo pakati pamyabo bapokigwe.

<sup>15</sup> Namanga Kyala bo abakaanile aBanyaisilaili, alinkumanyana nabo abandu abaa mfikolo ifingi. Linga Kyala ikumanyana na Banyaisilaili kangu, bukujaga buumi kuli aba baafwile!

<sup>16</sup> Linga umundu ansookiisye Kyala ifilubukilwa ukaja ikemo, fyosa ifi atondwile fikaja fiikemo. Kangu linga imisi igya nsyunguti miikemo, ni samba syake syope sikaja nyiikemo.

<sup>17</sup> Umwe mwe mukaja Banyaisilaili, muli bo isamba isya nsyunguti ugwa mmatengele. ABanyaisilaili bali bo isamba isya nsyunguti ugwa mu ngunda. ABanyaisilaili bamo batu-muliigwe ukufuma mu mpiki ugwa mu ngunda, umwe mulungisiigwe pabujo bwabo, mukumela nu kukaba ifinunu ukufuma mu nsi gwa nsyunguti ugu gubaliigwe.

---

† 11:13 11:13 *Untumigwa gwinu* Bala iisya *Abatumigwa* ku tsyakalingaania.

18 Po leelo mulingasiilaamwaga isamba isi situmuliigwe. Muleke ukwituufya. Mumanyege ukuti imisi gitikubasubila umwe, looli umwe jo umwe mukugisubila imisi.

19 Lumo kuti, "Isamba isyo syatumuliigwe ukuti une ningile pabujo bwabo."

20 Isyo sya nalooli. Isamba isyo syatumuliigwe kunongwa jaa kusita kwitika, looli ugwe gwimile kanunu kunongwa jaa lwitiko lwako. Po leelo gwtiimege, ulingiituufyaga.

21 Linga Kyala aasitumwile isamba isya kubwandilo, abagiile ukubomba bo ulo na kumyako.

22 Ukeete muno Kyala ajiliile ubununu, kangi nkali. Aababombiile ubukali aba baalinkaanile, looli ikukubombela kanunu ugwe, linga kwen-delela ukunsubila. Looli linga kunndeka, po nungwe kutumuligwa.

23 Boope aBanyaisilaili bala linga bikummwitika kangi Kyala, bikulungisigwa kangi mu nsyunguti, paapo Kyala ali na maka agaa kubalungisya kangi.

24 Po leelo ugwe gwe ukaja Mwisilaili gwatumuliigwe ukufuma mu nsyunguti ugwa mmatengele, na kulungisigwa mu nsyunguti ugwa mu ngunda. Ako kandu kapyo ukubombigwa.‡ Umanyege ukuti jikaja mbombo ngafu kwa Kyala ukubagomokesyapo aBanyaisilaili pabujo bwabo!

---

‡ 11:24 11:24 Abandu bikatumula isamba isya mpiki ugu gubyaligwe na kusilanga mu mpiki ugwa ndiisu. Looli akandu akapya apa, po apa Pauli ikuti isamba isya ndiisu sikulungigwa mu mpiki ugu gubyaligwe.

*Kyala ali nu lupaa kisyo ku bandu boosa*

<sup>25</sup> Baamyitu ndwitiko, ngulonda mumanye ulubaatiko ulo ulwa mbutiitu ulwa Kyala, ukuti mulingiisa kwituufya. ABanyaisilaili bamo bakafu indumbula, bikwendelela ukujja bakafu kukabalilo, mpaka jifwane imbalilo ijaa bandu baa mfiisu ifingi abaa kwambililigwa na Kyala.

<sup>26</sup> Ku njila ijo, aBanyaisilaili boosa bikwisa kupokigwa. Bo muno sisimbiigwe mwa Kalata uMwikemo ukuti,  
“UMpoki ikwisa kufuma nkaaja akaa mu Syoni,  
ikwisa kulupela ulujungu Iwa Jaakobo  
ukusita kunkaana Kyala.

<sup>27</sup> Ulo lwitikano lwangu ulu ngwisa kubika,  
po ngwisa kusoosyapo ubutulanongwa  
bwabo.”§

<sup>28</sup> Kunongwa jaa kukaana iNdumi iNunu, aBanyaisilaili baaliipelile balugu baa Kyala, ukukabamo umwe mwe bandu abaa mfikolo ifingi. Looli Kyala akaali abaganile, paapo aabasungwile abiisukulu baabo ku bwigane bwake.

<sup>29</sup> Namanga linga Kyala abasungwile abandu nu kubasaja, akabagila ukwandula.

<sup>30</sup> Kubwandilo umwe mukantiilaga Kyala, looli akabalilo aka ukusita kutiila ukwa Banyaisilaili kupelile ukupaakisigwa umwe.

<sup>31</sup> Bo lululo, ukupaakisigwa kwinu, kukwisa kupela ukupaakisigwa abeene, na paapo batikantiila Kyala akabalilo aka.

---

§ 11:27 11:26-27 Bala kalata gwa Jeesaaja 27:9; 59:20-21; Jelemija 31:33-34.

32 Po leelo Kyala abapinyile abandũ boosa pakiisũ kũ bukafu bwa ndumbula syabo, ukũti abapaakisye abandũ boosa.

### *Kyala atuufigwege*

33 Keeta, bo bwingi bukũ ubukabi ubwa Kyala, amahala nũ bũmanyi bwake ubukũlũmba? Jo jwani abagiile ukũbwagania ubũlongi, ni njila sya Kyala?

34 “Jwani asyageenie inyiinogono sya Ntwa Kyala, pamo jwani abagiile ukũndingaania?”\*

35 “Jwani ankopiisyemo akandũ Kyala, akaa kuti mpaka Kyala ahombe?”†

36 Namanga fyosa fikũfuma kũmyake, fyosa fyapeliigwe nagwe, fyosa filipo ukũnangisya ubũsisya bwake. Kyala atuufigwege bwila na bwila! Amenii.

## 12

### *Ukũmbombela Kyala*

1 Po baamyitũ ndwitiko, nikũbapyelesya kũ kibabiilisi ikya Kyala, mwiningege ukũja ikemo ilyũmi, iliikemo ili likũnkyela Kyala. Namanga ijo jo njila inunu ijaa kũmmwipuuta Kyala.

2 Mulingakongaga akajũilo ni nyiiho isya bandũ abaa pakiisũ apa, looli Kyala abasanusye mu ndumbula syĩnu ukũti muje ni nyiinogono imbya. Apo po aamukũmanya kũ bwanalooli

---

\* **11:34 11:34** Bala kalata gwa Jeesaaja 40:13. † **11:35 11:35** Bala kalata gwa Jobu 41:11.

inunu isi Kyala ikulonda, isi sikaagilwa na isi sikankyela.

<sup>3</sup> Paapo Kyala ambeelee iipyana ukujantumigwa gwake, nikubabwala umwe mwesa nikuti, muleke ukwibona ukuti mubagiisye ukukinda muno mujiliile. Looli mwinogonege ku mahala ukuti mwesa mupeeliigwe ulwitiko lulalula na Kyala.

<sup>4</sup> Umbili guli gumogwene, leelo guli nu tumbakaasya twingi. Kukuti kambakaasya kali ni mbombo jaake.

<sup>5</sup> Bubwabo bo muno gujiliile umbili gwa Kilisiti. Uwe twesa tuli mbili gwake gumogwene. Kukuti mundu kambakaasya kamo akaa ntumbakaasya twingi utwa mbili gumogwene ugo.

<sup>6</sup> Po leelo, Kyala kwi ipyana lyake, ampeelee kukuti mundu ikikungilwa ikya lako lwake. Uguwa kikungilwa ikya bukunguluka, akibombelege ukukongana nu lwitiko lwake.

<sup>7</sup> Uguwa kikungilwa ikya bubombeli, ababombelege ni ndumbula joosa. Uguwa kikungilwa ikya bumanyisi, amanyisyege kanunu.

<sup>8</sup> Uguwa kikungilwa ikya kubakasya abandu, abakasyege. Uguwa kikungilwa ikya kubatwala abandu ifi baagiilwe, abapege ni ndumbula joosa. Uguwa kikungilwa ikya bulongosi, iijulege ukulongosya kanunu. Uguwa kikungilwa ikya kupaakisywa, apaakisyege nu lusekelo.

*Ukuganana nkipanga kya Kyala*



9 Mugananege kisita kusyobana. Mububengege loosa ububiibi boosa. Mwitotekege mu nunu akabalilo koosa.

10 Mugananege mwesa bo ulwa banyamundu. Kukuṭi mundu anyonywege fiijo ukummwimika unine.

11 Muleke ukujja boolo, looli mummbombelege unṭwa Jesu bo mukulongosigwa na Mbepo Mwikemo.

12 Namusekelege paapo mukusubila ukukaba inunu ukufuma kwa Kyala. Mumuililege linga ubatolwe bukubiisila, kangi munsamege Kyala akabalilo koosa.

13 Musangulege ifya kubatula abiitiki biiniinu. Kangi mujege bengo ukubambilila kanunu abaheesya mu nyumba syinu.

*Muno sikulongelwa ukubabombela abangi*

14 Mubasajege abandū aba bikubafunda, mubasajege somma ukubaguna.

15 Musekelege pamopeene nabo aba bikusekela. Mulilege pamopeene na aba bukulila.

16 Mutugalege kanunu na biiniinu. Mulingiituufyaga, looli mujege nu bulilanisi na bandū abafujufu, mulingiibonaga ukuti mubakindile amahala.

17 Abandū linga bikubabombela ububiibi, mulingababombelaga nuumwe ububiibi. Looli musiinogonege fiijo isi sikuboneka ukujja nunu ku bandū boosa.

18 Mubombege syosa isi mubagiile ukusibomba ukuti mutugalege nu lutengaano na bandū boosa.

19 Bakundwe bangũ, mulingabusyaga ububiibi, looli mundekelege Kyala jo abombege isyo. Namanga sisimbiigwe mwa Kalata uMwikemo ukuti, “Untwa Kyala ikuti, ‘Uubukisyo lo lwangu, nikubukisyaga jujune.’ ”\*

20 Isya kusita kubukisya sisimbiigwe mwa Kalata uMwikemo ukuti,  
 “Linga undugu gwako ali ni njala, umpege ifindu,  
 kangi linga ali ni kyumilwa, umpege ifya kunwa.  
 Namanga linga kubomba bo ulo,  
 bo ummbiikiile umooto ugu gukwaka pantu pamyake.”†

21 Ulingatoligwaga nu bubiibi, looli ubutolege ububiibi ku njila ijaa kubomba inunu.

## 13

### *Ukubimika abalongosi*

1 Kukuti mundu ikulondigwa ukubimika abalongosi abaa silikali. Namanga ubulongosi boosa bukufuma kwa Kyala, kangi boope boosa babiikiigwe nagwe.

2 Po leelo umundu gwesa uju ikubupinga ubulongosi bwabo, ikupinga ulubaatiko lwa Kyala. Abandu abo bikwisa kufundigwa.

3 Namanga umundu uju ikubomba inunu atikuja nu lutende ku ndongosi, looli uju ikubomba imbiibi. Bule, kulonda ukusita kaja

---

\* **12:19 12:19** Bala kalata gwa Ukukumbuka Ingomeelesyo 32:35. † **12:20 12:20** Bo ummbiikiile umooto ugu gukwaka pantu pamyake Kokuti Bo gunkosiisye isoni. Bala kalata gwa Isya Mbupingamu 25:21-22.

nũ lutende kũ balongosi baako? Po bombaga inunu, ʔndongosi ikukutuufyaga.

<sup>4</sup> Namanga ʔndongosi mbombeli gwa Kyala, imbombo jaake ko kukutuula ugwe. Looli linga ʔbombile simo imbiibi, po ʔtiilege! Paapo ali na maka agaa kufunda, bukaja bulongosi bwa itolo! ʔmwene mbombeli gwa Kyala, atumiigwe kukubatwalila ababomba mbiibi ʔlufundo lwa Kyala.

<sup>5</sup> Fyobeene abandũ bikulondigwa ʔkwijiisya kũ balongosi, somma kunongwa jaa kutiila lwene ʔlufundo lwa Kyala, looli kunongwa jaa kuti mumeenye mu ndumbula ʔkati kununu ʔkubomba bo ʔlo.

<sup>6</sup> Kangi kunongwa ijo mukusonga isongo. Namanga ababombeli abaa silikali babombeli baa Kyala. Bikwijũla kũ mbombo ijo.

<sup>7</sup> Namubapege boosa ifi bikulondigwa ʔkũpeeligwa. Linga kulondigwa ʔkusonga isongo, ʔsongege. Linga ʔmundũ jũmo ikulondigwa ʔkwimikigwa, iimikigwege.

### *ʔkũganana*

<sup>8</sup> Mulingameleligwaga akandũ kokoosa nũ mundũ gwesa, looli mumeleligwege ʔkũganana ʔmwẽ. Namanga ʔjũ ikunngana ʔnnine, asibombile indagilo sya Kyala.

<sup>9</sup> Keeta indagilo sikati, “ʔlingalogwaga, ʔlingagogaga, ʔlingahijaga, kangi ʔlinganyonywaga akandũ akaa nnino.”\* Looli indagilo isyo syosa sili ndalagilo lumolwene

---

\* **13:9 13:9** Bala kalata gwa ʔkusooka 20:13-17; ʔkũkumbũka Ingomeelesyo 5:17-21.

itolo ulu lukuti, “Ubaganege abanino bo ulu gwijiiganile ugwe.”†

<sup>10</sup> Umundu ujū ikunngana unnine, atikummbombela imbiibi. Ukubagana abandu abangi ko kusibomba indagilo syosa isya Kyala.

### *Kuli kifuki ukukya*

<sup>11</sup> Mukulondigwa ukubomba bo ulo paapo mumeenye ukuti akabalilo akaa kulembuka kafikile. Po akabalilo akaa bupoki bwitu kali kifuki fiijo, ukukinda kubwandilo apa twalyandile ukummwitika unntwa Jesu.

<sup>12</sup> Akabalilo aka ikilo kimaliike, kuli kifuki ukukya. Po tusileke imbombo imbiibi isya mu ngiisi, tufwale ifilwilo ifya ndumuli.

<sup>13</sup> Tujege na kajiilo akanunu bo ulwa bandu abaa pamuusi. Tulingajaga bagaala bwalwa, pamo ukumoga imogo isya bulogwe, pamo ukubomba imbombo ingosya soni, pamo ukulwa nu kija nu buufi.

<sup>14</sup> Looli mumfwalege unntwa Jesu Kilisiti ngati mwenda. Mulingiitikaga na panandi ukulongosigwa ni finyonyo fyinu ifibiibi ifya bundu bwinu ubwa butulanongwa.

## 14

### *Ukubabombela kanunu aboonywa ndwitiko*

<sup>1</sup> Mummwambililege umwitiki mwiniinu umoonywa ndwitiko. Mulingakaanikanaga nagwe kunongwa jaa nyiinogono syake isi mulegeene nagwe.

† 13:9 13:9 Bala kalata gwa Abanyaleebi 19:18.

2 Ɖmundu jumo ikwibona ukuti abagiile ukulya akandu kokoosa, looli ujungi umoonywa ndwitiko, ikulya iiseeke ilya maani lyene.

3 Uju ikulya inyama alingammwilaamwaga uju ikulya iiseeke ilya maani lyene. Joope uju ikulya iiseeke ilya maani lyene alinganndongaga uju ikulya inyama, namanga Kyala abambiliile boosa bobabili.

4 Gwe gwani gwe kwibona ukuti ubagiisye ukunndonga umbombeli gwa mwinaako? Untwa gwake jujo jo ikatumula ukuti umbombeli gwake asobile pamo akasoba. Na pabulongi umundu ujo ikwisa kutola, paapo uNtwa Jesu ikwisa kumpela ukutola.

5 Ɖmundu jumo ikulyimika iisiku limo ukulikinda iisiku ilingi ukummwipuuta Kyala, ujungi ikwaga goosa gafwene itolo. Kukuti mundu asikongege isi ikwaga nunu mu ndumbula jaake.

6 Ɖmundu uju ikulyimika fijo iisiku limo, ikubomba bo ulo ukunkyela uNtwa Kyala. Joope uju ikulya inyama, ikubomba bo ulo ukunkyela uNtwa Kyala, namanga umwene ikuntuufya Kyala ku findu fyake. Joope uju ikulya iiseeke ilya maani lyene, ikubomba bo ulo ukunkyela uNtwa Kyala, joope ikuntuufya Kyala.

7 Linga uswe tuli buumi, pamo linga tukufwa, sitikuja sya kukabamo uswe twibeene.

8 Linga tuli buumi, uNtwa gwitu Jesu atu-ufigwege. Linga tukufwa, uNtwa gwitu Jesu atuufigwege. Linga uswe tuli buumi, pamo linga tukufwa, tali baa Ntwa Jesu.

9 Kilisiti aafwile, kangi aasyukile, ukuti aje Ntwa gwa bandu boosa, abafwe na buumi.

10 Po fiki bamo pakati pamyinu bikunndonga ugwamyabo ndwitiko? Kangi fiki bikummwilaamwa ugwamyabo? Namanga uswe twesa tukwisa kwima nkyeni mwa Kyala ukuti tulongigwe.

11 Bo muno sisimbiigwe mwa Kalata uMwikemo,  
 “Kyala ikuti,  
 ‘Nalooli kukuti mundu ikwisa kufugama nkyeni mmyangu,  
 nu kujoba ku lulimi lwake ukuti une ne Kyala.’ ”\*

12 Po leelo kukuti mundu pakati pamyitu, ikwisa kulingaania jujo isyake nkyeni mwa Kyala.

### *Ukutugala pamopeene ku lutengaano*

13 Po leelo tuleke ukubalanga abiiitiki biiniitu. Looli tutumule ukusita kubomba kokoosa akaa kwikinyamo pamo ukusobesya.

14 U Ntwa Jesu aanangiisye une pabwelu, kangi mbumeenye ubwanalooli ukuti, fikajapo ifindu fimo ifi fili mwiko. Looli umundu linga ikufibona ifindu fimo ukaja mwiko, po ifindu ifyo kumyake fikujaga mwiko.

15 Linga ugwe kuntwalila ubusulumanie umwitiki nnino ku findu fimo ifi kulya, nalooli ugwe ukaja nu lugano ku mwinaako ujo. Kilisiti aalimfwiliile ujo. Ulingammoonangaga kunongwa jaa findu fyako!

---

\* 14:11 14:11 Bala kalata gwa Jejesaja 45:23.

16 Mupeeliigwe ifinunu, mulingabombaga isya kubapela abangi ukufijoba ububiibi.

17 Namanga ubunyafyale bwa Kyala kukaja ko kulya nu kunwa, looli ko kubomba isya bugolofu, ukaja nu lutengaano pakati pamyitu, nu kaja nu lusekelo ulu lukufuma kwa Mbepo Mwikemo.

18 Joope uja ikumbombela Kilisiti bo ulo, ikunykela Kyala, kangi abandu bikummwitikila.

19 Akabalilo koosa twijulege ukubomba isi sikutwala ulutengaano, na isi sikutuula ukujengana ndwitiko.

20 Ulingoonangaga imbombo jaa Kyala kunongwa jaa findu fyako. Fikajako ifindu ifi fili mwiko, looli kabiibi fijo ukummwingisya umwinaako mbutulanongwa kunongwa jaa findu ifi kulya.

21 Paakipo uleke ukubomba isi umwinaako abagiile ukwikinyamo, kuje ko kulya inyama, pamo ukunwa ifinga,† pamo syosyosa sila.

22 Inyiinogono isi uli nasyo ku findu, sijege syako gwimwene nkyeni mwa Kyala. Asajiigwe umundu uja atikwibona ukaja ntulanongwa, bo ikusibomba isi ikusibona ukaja sya bugolofu.

23 Looli linga kufilaamwa ifindu fimo, poope kulya ifindu ifyo, po uli ntulanongwa, paapo utikubomba ukukongana nu lwitiko lwako mwa Kilisiti. Namanga kukuti kandu aka kubomba, linga katikufuma ndwitiko lwako mwa Kilisiti, ako bo butulanongwa.

## 15

---

† 14:21 14:21 *Ifinga* Bala ku Isyakulingaania.

*Isya kubabombela abangi*

<sup>1</sup> Po uswe twe takakile ndwitiko, tukulondigwa ukubatwala aboonywa ndwitiko. Tulingabombaga syene isi sikutukyela juuswe.

<sup>2</sup> Uswe twesa tubabombelege kanunu abiitiki biinitu, ukuti bakake ndwitiko.

<sup>3</sup> Namanga joope na Kilisiti akiikyelaga mwene, looli aasibombaga isi sisimbiigwe mwa Kalata uMwikemo ukuti, "Amaheelu aga bikukatuka ugwe Kyala, gaaliinyaagile une."\*

<sup>4</sup> Syosa isi syasimbiigwe ijolo mwa Kalata uMwikemo, syasimbiigwe ukutumanyisya uswe. Amasimbo ago gikutupa uluamiililo nu kutukasya, ukuti tajege nu lusubilo.

<sup>5</sup> Kyala uju ikutupa ukuumiilila nu kutukasya abapele ukuja kandu kamokeene, bo mukankonga Kilisiti Jesu.

<sup>6</sup> Po umwe mwesa muntuufyege Kyala pamopeene ni ndumbula jimojeene, uGwise gwa Ntwa gwitu Jesu Kilisiti.

*Abiitiki boosa kandu kamokeene*

<sup>7</sup> Po leelo namwambililanilege bo ulu Kilisiti aabambiliile umwe, ukuti Kyala atuufigwege.

<sup>8</sup> Namanga nikubabwala umwe nikuti, Kilisiti aaliisile kukubabombela aBajuuta. Aabanangisye ukuti Kyala gwa bwanalooli, nu kuti abombile isi aafingile ku biisukulu baabo.

<sup>9</sup> Kangi ukuti abandu aba bakaja Bajuuta bantuuufyege Kyala ku lupaaakiso lwake, bo muno sisimbiigwe mwa Kalata uMwikemo ukuti,

\* 15:3 15:3 Bala kalata gwa Isabuli 69:9.



“Po angukwimbila inyimbo isya kukutuufya nkyeni mmbandũ abaa mfikolo ifingi.”†

10 Kangi ikuti,

“Mwe bandũ mwe baa mfikolo ifingi,  
namusekelege pamopeene na bandũ baa  
Kyala.”‡

11 Kangi ikuti,

“Umwe mwe bandũ baa mfikolo ifingi,  
namuntuufyege Kyala.

Umwe mwe bandũ boosa pakiisu,  
namunngindikege Kyala!”§

12 Joope unkunguluka Jeeseja ikuti,

“Umundu jumo ugwa ndujungu ulwa Jese ik-  
wisa,  
ikwisa kulongosyaga ifikolo ifingi,  
abandũ abaa mfikolo ifingi bikwisa  
kunsuubilaga.”\*

13 Po Kyala ujũ ikutupa ulusuubilo, abapepo ulusekelo loosa nu lutengaano ndwitiko lwinu, ukuti ulusuubilo lwinu longelele ku maka agaa Mbepo Mwikemo.

*Inyango ijaa Pauli ukusimba inongwa isi*

14 Baamyitu ndwitiko, une mmeenye fi-  
ijo ukuti umwe muli bandũ banunu, kangi  
mwiswile ubumanyi bwa Kyala, kangi mubagiile  
ukumanyisania.

15 Leelo inongwa isyo isi mbasimbiile,  
nsibiikile pabwelu kisita kutiila nkyeni mmyinu.

† 15:9 15:9 Bala kalata gwa 2 Samweli 22:50; Isabuli 18:49.

‡ 15:10 15:10 Bala kalata gwa Ukukumbuka Ingomeelesyo 32:43. § 15:11 15:11 Bala kalata gwa Isabuli 117:1. \* 15:12

15:12 Bala kalata gwa Jeeseja 11:10.

Naalondaga ukubakumbusya syosa, paapo iji jo mbombo iji Kyala ambeele ukujibomba ukukongana ni ipyana lyake.

16 Imbombo ijo ko kaja mbombeli gwake Kilisiti Jesu ku bandu aba bakaja Bajuuta. Ngubalambilila iNdumi iNunu, ukuti nje bo ulwa mpuuti uju ikubaninga umwe kwa Kyala, bo ulwa ikemo ilya kunkyela Kyala, ili lyelusigwe na Mbepo Mwikemo.

17 Po leelo, paapo ndungeene na Kilisiti Jesu, ngwituukifya imbombo iji ijaa kumbombela Kyala.

18 Une ndikujoba akandu kokoosa akangi, looli syene isi Kilisiti abombile ukwendela kumyangu, ukubapela abandu aba bakaja Bajuuta ukuti bantiilege Kyala. Aabombile bo ulu ku njila jaa masyu gangu na ku mbombo isi naasibombaga,

19 ukwendela mfwiswigo na mfimanyilo fingi, ifi naabombile ku maka agaa Mbepo gwa Kyala. Po leelo nsyungutiile kukuti bujo kukufumusya iNdumi iNunu ijaa Jesu Kilisiti, ukwandila mu Jelusalemu mpaka nkiisu ikya mu Iluliko.

20 Kuli syosa isi, ulubaatiko lwangu ko kufumusya iNdumi iNunu kuno bakajimanya ingamu jaa Kilisiti, ukuti ndingiisa kujenga pa lwalo ulwa mundu ujungi.

21 Isi syosa sisimbiigwe mwa Kalata uMwikemo ukuti,

“Abandu aba bakaabuliigwe inongwa syake,  
bikwisa kumbbona,

na bandu aba bakaapiliike,

bikwisa kummanyanya.”†

*Uluabaatiko ulwa Pauli ukujaaata mu Looma*

<sup>22</sup> Imbombo ijo jo iji jaaliisigiile kaa kingi ukwisa kumyinu.

<sup>23</sup> Looli liilino mmalile imbombo jangu nkiisu iki ndimo, kangi nsyukilwe ifyinja fingi ukwisa kukubajaatila uko.

<sup>24</sup> Akabalilo aka mbaatiike ukufika nkiisu ikya Sipanija. Po leelo ngusubila ukubajaatila bo ngwenda injila ijaa kubuuka uko. Bo mbuugile ukwangala na nuumwe, po ngwisa kusookangapo. Ngusubila ukukaba kumyinu ifya kunduuula ukwendelela ni njila jangu.

*Uluabaatiko ulwa Pauli ukutwala ifya butuuli ku Jelusalemu*

<sup>25</sup> Looli nsumwike taasi ku Jelusalemu, ukuti mbatwalile ifya kubatuula abiitiki abaa kula.

<sup>26</sup> Abiitiki abaa nkiisu ikya ku Maketonija na ku Akaja, baalyagile kanunu ukusangula utundu twabo utwa kubatuula abiitiki abalondo abaa kula ku Jelusalemu.

<sup>27</sup> Abiitiki abo baabombile bo uo nu lusekelo, kangi nalooli bikuboneka bikumeleligwa ukubatuula abalondo abo. Namanga abandu aba bakaja Bajuuta bali mbuliilanisi pamopeene na Bajuuta mu sajo isya mwa Mbepo Mwikemo. Po leelo bikulondigwa boope ukuja mbuliilanisi pamopeene na Bajuuta mu sajo isya mu mbili.

<sup>28</sup> Bo mmalile imbombo ijo, ijaa kubapa ifya butuuli abalondo abo, po angubajaatila umwe nu kwendelela ukubuuka mpaka ku Sipanija.

† 15:21 15:21 Bala kalata gwa Jeeseja 52:15.

29 Mmeenye ukuti bo ndi kumyinu, Kilisiti ikwisa kubasaja fiijo pakabalilo akaa kwangala pamopeene, une na nuumwe.

30 Baamyitu ndwitiko, ku maka agaa Ntwa gwitu Jesu Kilisiti nu lugano ulu lukufuma kwa Mbepo Mwikemo, ngubapyelesya ni ndumbula jangu joosa, mwijulege pamopeene na niine ukujipuutula imbombo jangu.

31 Muunyiipuutilege ukuti, Kyala aandindililege ku bandu aba batikummwitika Jesu abaa nkiisu ikya mu Jutai, ukuti balingaafulasya. Kangi ukuti, abiitiki abaa mu Jelusalemu bambilile ifya kubatula ifi ngubatwalila.

32 Bo isyo sibombiigwe, mbagiile ukwisa kumyinu, Kyala linga iiganile. Anguja nu lusekelo fiijo nu kutusya pamopeene na nuumwe.

33 Kyala ugwa lutengaano, ajege na nuumwe mwesa! Ameni.

## 16

### *Uburonio lwa Pauli ku mundu jumojo*

1 Ngulonda mummwambilile Foibe umwitiki mwinitu paapo mundu nnunu. Umwene ntuli gwa kipanga kya Kyala ikya mu Kenkeleja.

2 Mummwambilile kanunu mu Ntwa Jesu, bo muno sikulondeligwa ku bandu baa Kyala. Mumperu ubutuli boosa ubu ikulonda, paapo umwene joope abatulile fiijo abandu bingi, fiijo une.

3 Mubaponiege Pilisika nu ndume Akwila, ababombeli biinangu mu mbombo jaa Kilisiti Jesu.

4 Abeene bakaabupaasiisye ubuumi bwabo kunongwa jangu. Ngugwa ulupi fiijo kumyabo, ngaja jo une niimwene itolo, looli na bandu abaa mfipanga ifya Kyala ifya mfiisu ifingi.

5 Kangi mubaponiege abiiitiki aba bikwaganila mu nyumba jaabo.

Mumponiege Epeneti ukundwe, ujū aali gwa kwanda ukummwitika Kilisiti kula nkiisu ikya Asija.

6 Mumponiege Malija, ujū aaliijūalile fiijo kunongwa jinu.

7 Mubaponiege baa Andilonika na Junija abajuuta biinangu, aba baapinyiigwe pamopeene na niine mu nnyololo. Abo baatalilepo kumyangu ukummwitika Kilisiti, kangi bikwimikigwa fiijo mbatumigwa.

8 Mumponiege Ampilyati, ukundwe gwangu mu Ntwa Jesu.

9 Mumponiege Ulibani, umbombeli mwiniitu mwa Kilisiti, pamopeene na Sitaki, ukundwe gwangu.

10 Mumponiege Apele, ujū aalyendiile mu ngelo inyingi kunongwa jaa Kilisiti.

Mubaponiege abandū abaa nnyumba ijaa Alisitobuli.

11 Mumponiege Elotyoni unjuuta mwinangu.

Mubaponiege abandū abaa nnyumba ijaa Nalikisa, aba bammwitiike unntwa Jesu.

12 Mumponiege Tilifena na Tilifosa. Abakiikula abo bikwijūla fiijo ukubomba

imbombo jaa Ntwa.

Mumponiege Pelisi unkundwe, unkiikulu uju joope aaliijwulile fiijo mu mbombo jaa Ntwa.

<sup>13</sup> Mumponiege Lufu, unsunguligwa ugwa Ntwa, kangi mumponiege unna, uju aaliimbombiile bo ulwa mwanaake.

<sup>14</sup> Mumponiege Asinkilita, Filegoni, Elime, Patiloba na Elima, na biitiki boosa aba bali pamopeene nabo.

<sup>15</sup> Mubaponiege Filologa na Julija, Neleju ni ilumbu, na Olimpa, na biitiki boosa aba bali pamopeene nabo.

<sup>16</sup> Namuponaniege ku lugano ulwa nalooli. Abiitiki boosa abaa mfipanga ifya Kilisiti ifya kuno bikubaponia fiijo.

### *Isya kubasoka na luponio lwa kamaliikisya*

<sup>17</sup> Baamoyitu ndwitiko, muje maaso na bandu aba imanyisyo syabo sikubapela abiitiki ukutapukana, na koonanga ulwitiko lwabo. Mujege patali nabo, namanga imanyisyo syabo sikupingana na isi mwamanyisiigwe.

<sup>18</sup> Sya bwanalooli, abandu abaa luko ulu batikumbombela unntwa gwitu Kilisiti, looli bikulonda syene isi basiganile. Bikujoba inongwa isya kutengulila, looli ngimba bikubasyoba abiitiki aboonywa ndwitiko.

<sup>19</sup> Boosa bapiliike ukuti umwe mulikolile kanunu iisya ilya Kyala. Isyo sikuhobosya fiijo une, leelo ngulonda mujege na mahala mu mbombo inunu, kangi mulingakwabigwaga na butulanongwa.

<sup>20</sup> Kyala ugwa lutengaano ikuntakania Seetano nu kantola loosa paasi pa malundi giinu. Hliipyana lya Ntwa gwitũ Jesu lijege na nuumwe.

<sup>21</sup> Ikubaponia Timoti umbombeli mwinangũ. Kangi bikubaponia baa Lukio, Jaasoni na Sospateli, abajuuta biinangũ.

<sup>22</sup> Na niine Teliti, ne nsimbi gwa kalata ujũ ugwa Paũli, ngubaponia mu ngamu ijaa Ntwa Jesu.

<sup>23</sup> Ikubaponia Gajo ujũ mu nyumba jaake mo muno ngũtũgala, kangi mo muno abiitiki abaa nkipanga kyosa kya Kyala bikwaganila. Kangi ikubaponia Elasiiti umbũika ndalama sya kaaja akaa mu Kolinti. Joope Kwaliti umwitiki mwiniĩtũ, ikubaponia. [

<sup>24</sup> Hliipyana lya Ntwa gwitũ Jesu Kilisiti lijege na nuumwe mwesa. Amenii.]\*

### *Paũli ikũntuufya Kyala*

<sup>25</sup> Kyala atuufigwege! Ujũ abagiile ukubakasya ukwendela mu Ndũmi iNunu ijaa Jesu Kilisiti, iji ngũlũmbilila. Indũmi ijo ijolo jaafisiigwe, looli akabalilo aka jisetũligwe.

<sup>26</sup> Kyala ugwa bwila na bwila aalagiile ukũti indũmi ijo jisetũligwe ukwendela mwa Kalata umwikemo. Kangi ukũti abandũ abaa mfiisu fyosa bajimanye indũmi ijo, bammwitike nu kummwimika.

<sup>27</sup> Po ku njila ijaa Jesu Kilisiti, tũntuufyege mwene Kyala ugwa mahala goosa. Ajege nu busisya bwila na bwila! Amenii.

---

\* **16:24 16:24** Baakalata bamo abaa ijolo bakaja na kanandi aka.

**Ulwikano Ulupya**  
**Nyakyusa-Ngonde: Ulwikano Ulupya (New**  
**Testament+)**

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

14ff4521-53e4-562c-aacb-6f4faf55a6c8